

金梅

花淵百

集咏





咏百花梅

中峯禪師著
周履靖校

編主五雲王

編初成集書叢

種一他其及咏百花梅

中華民國二十五年十二月初版

徐

發行人

王雲五
上海河南路

印刷所

商務印書館
上海河南路

發行所

商務印書館
上海及各埠

中峯禪師梅花百咏

元中峯禪師著

明周履靖校梓

古梅

起如虬伯卧如槎猶吐冰霜度歲華
山月江風常是伴不知園館屬誰家

老梅

種花年少負幽期歷遍風霜不計時
願我今居丈人行愿遺清白蔭孫枝

踈梅

依稀殘雪浸寒波
桃李湯山奈俗何
瀟灑最宜三二點
好花清影不須多

孤梅

獨抱冰霜歲月深
舊交松竹隔山林
英姿孑立誰堪托
惟有程嬰識此心

瘦梅

冰肌如削怯寒威
天賦清羸可得肥
我亦詩癯被花惱
玉人渾欲不勝衣

矮梅

籬落盤根枕水坡
月低清影舞婆娑
青衣童子慚三尺
花底相逢唱短歌

蟠梅

鐵石芳條誰矯揉
從教曲折抱天姿
龍蛇影碎玲瓏月
交錯難分南北枝

鴛鴦梅

采采雙花對錦機
翠禽同夢月交輝
有情一處隨流水
莫被風吹各自飛

千葉梅

密攢玉瓣費神工
什百春藏一朵中
雪壓鮫綃花骨冷
故教重疊護東風

苔梅

古貌蒼然鶴膝枝
吐花生暈護春機
玉堂試看青袍客
莫忘江南有白衣

寒梅

北枝偏愛雪霜多
無奈蜂媒凍損何
一任玉奴呵手折芳心
元自抱陽和

臘梅

金玉同盟破雪開
清香異色滿瑤臺
不因蜜滓將花染
安得蜂黃點額來

綠萼梅

翠袖籠寒映素肌
靚粧仙子月中歸
露香清逼瑤臺曉
隱約青衣侍玉妃

紅梅

清標何事厭鉛華
故染胭脂妬杏花
幸得枝頭香彷彿
不然流落作凡葩

胭脂梅

濃妝出色染芳林
春入胚胎造化深
非是玉顏凝酒暈
也知紅粉有丹心

粉梅

玉容有似傅鉛華
濃抹臙脂未足誇
白面何郎不須試
揚州清賞壓瓊花

杏梅

董林驀地暗香傳
淡淡紅芳照眼妍
有客前村來問酒
牧童誤指到花邊

新梅

幼玉嬌姝欲效顰
初花小試一年春
花前明月無今古
花下詩人非古人

早梅

攬先開遍向陽枝
不是清閒刻骨時
好似洛陽年少客
香腮霜雪上頭遲

未開梅

緘春蓓蕾冷含烟
絳蠟春香信暗傳
姑射怯寒猶揜袂
眼前惟見蕊珠仙

半開梅

一片芳心早破寒
踈英向暖點酥軋
却愁爛熳成搖落
春色平分正好看

十月梅

年年開占小春時
點綴湖山景最宜
造化流芳何太早
無陽安得有南枝

乍開梅

曉粧初試薄寒侵
漏洩春機想未深
昨夜枴房花蕊小
爲誰索笑露芳心

全開梅

瓊姬小隊遍深宮
滿面春生大笑中
畢竟花房羞半掩
一齊分付剖東風

二月梅

臘蕊開遲到四陽
丈人殿入少年場
凡花一見應相妬
肯對東風聘海棠

憶梅

夜分明月是揚州
尚有春風在樹頭
莫怪當年何水部
歲寒心事與誰愁

問梅

寄聲湖上舊花魁曾有逋仙行輩來
青鳥經年方信杳春風笑口爲誰開

探梅

踏破溪邊一徑苔好山秀水少人來
梅花開處憐無伴笑折新枝當酒盃

尋梅

上春有約覓南枝水竹人家遍扣時
一任灞橋風雪冷蹇驢破帽不因詩

索梅

幽探名花謝俗氛幾回東閣挹清芬掇來盆盎
難爲色萬玉枝頭蚤見分

觀梅

月下相逢認未真曉來標格愈精神林逋仙去
芳名冷誰是花前巨眼人

賞梅

愛花終日對瓊林飽翫豪吟興趣深檀板金樽
非樂事此心清白是知音

評梅

月旦花前豈乏人
風霜齒頰帶陽春
江南野史餘芳論
絕世清如古逸民

歌梅

六片紅牙捧雪兒
花前低唱怕花飛
後庭玉樹空陳迹
白雪一聲人聽希

友梅

三益堂前世外人
歲寒誰是舊雷陳
知心千古惟松竹
冷淡相交始見真

寄梅

故人遙隔隴雲邊折玉傳香水驛寒江北江南
重相憶只將春信報平安

惜梅

香銷泥污意裴回掠地迴風玉作堆愁絕黃昏
無一語怕看孤月上牕來

夢梅

玉笛聲飛江上樓芳魂驚曉動清愁覺來人問
商岩下曾見和羹傳說不

移梅

湖邊鋤月換根基
玉樹重栽樹不知
種竹當年遺性在
須留宿地就南枝

譜梅

自古騷人雖着語
何如朱璟獨知音
祗緣彼此傷真操
寫出平生鐵石心

接梅

采玉金刀巧若神
好枝分得續孤根
待看夜雨蒼苔長
幻出春風不見痕

浴梅

玉骨清寒礙雪痕
金壺香水浸來溫
餘波輕頰
春風面應是新承雨露恩

折梅

殘雪輕搖攬素肌
故人應說寄來遲
花時先假
調羹手選取東風第一枝

剪梅

破玉并刀試手溫
香凝雙股斷芳魂
花隨燕尾
輕分去不帶春風爪甲痕

簪梅

折玉臨風帶笑簷烏巾春滿酒厭厭少年莫訝
頭如雪猶勝梨花壓帽簷

粧梅

五出風流拂面輕點成宮額暎花明覺來不用
臨鸞鏡蝶粉蜂黃一洗清

浸梅

插花貯水養天真瀟灑風標席上珍清曉呼童
換新汲只愁凍合玉壺春

落梅

風榭飛瓊舞遍時
春初早賦惜花詩
家童輕掃庭前雪
莫遣香泥污玉肌

別梅

花謝東風攬離思
愁翻縞袂忍輕分
月明梢送臨溪水
春樹遙憐隔暮雲

羅浮

高卧花林醉復醒
不知月落與參橫
人生總是南柯夢
獨有師雄一夢清

庾嶺梅

星河漾影浸寒梢
甘與孤松結故交
庾老品題今寂寞
蟠枝屈曲似潛蛟

孤山梅

種玉西湖獨占春
逋仙佳句播清芬
月明花落吟魂冷
童子何之鶴守墳

西湖梅

花發蘇堤柳未烟
主張風月小壺天
清波照影紅塵外
冷看遊人上画船

江梅

尋香日日醉江邊
更買扁舟花下眠
酒醒潮生風力緊
掀篷無奈雪漫天

山中梅

春在雲根竹裏家
霜林烟麓乍藏遮
隔溪杖屨徘徊處
祇見香來不見花

清江梅

古樹烟籠碧玉流
酒旗風勁暗香浮
只今卧雪滄波上
幾見看花人白頭

溪梅

香悄波寒月澹時
山人散步水之湄
一灣淺處卧蟾影
欲画欲吟心自知

野梅

烟泊水昏江路迷
香寒樹冷雪垂垂
玉堂夢寐無心到
絕似遺賢遁跡時

遠梅

雪泥踏遍十餘里
迢遞疎林接野橋
何日移春歸院宇
免教望斷玉人遥

前村梅

竹外疎花花外橋托根聚落任風饗一從茅店
吹香後踏雪來尋酒價高

漢宮梅

玉破塵妝迹已陳劉郎從古惜芳春新粧日照
明飛燕冷落長門拜月人

宮梅

長門月冷漏遲遲正是香愁粉怨時折得一枝
無寄處翻思紅葉好題詩

官梅

螺牆蘚壁護蒼虬
落花開客去留誰是參軍
最相憶迢迢從路到揚州

衙宇梅

種花官宇說揚州
何遜多情憶舊遊
二十四橋春斲歇
玉簫吹雪小紅樓

柳營梅

花寨穿楊月掛弓
霜飛玉帳帶春風
綠陰止渴將軍老
灞上應魁白戰功

城頭梅

杖策尋芳近東郭
女垣無月亦精神
角聲吹徹霜天曉
十萬人家總是春

庭梅

曲欄干外玉成行
猶似當年虢國粧
不是化工私冷艷
自緣紅紫怯冰霜

書窓梅

擬魁春榜冠瓊林
對白抽黃幾夜深
雪案香浮雲葉冷
平生清苦此時心

琴屋梅

花月寒窓彈白雪冷然寫出廣平心
臨風三喚還三弄清極香中太古音

棋墅梅

孤山擬折東山屐白戰曹林望解圍
妙斡神機先一點落花隨子鬪斜飛

僧舍梅

紫竹林中艾衲寒淨瓶曉折供金仙
三生石上精魂在清夜靜叅花月禪

道院梅

玉珮光寒白錦袍
步虛人立月華高
赤松若遇如相問
近日玄都不種桃

茅舍梅

數椽草屋延清客
竹作踈籬護玉葩
不是玉堂無分到
且和明月到山家

簷梅

不礙丁東敲玉珮
小簷風韻屬黃昏
分明半幅推蓬風
只欠枝頭月一痕

釣磯梅

蒼苔石上老烟波
手把長竿倚玉柯
聞繫孤舟
明月下寒香一夜沁漁簑

樵徑梅

峻嶺孤芳吐未勻
半欹山路半爲薪
帶將擔上來城市
饒取春風賣與人

蔬圃梅

剪韭春園香暗浮
籬邊墻角試尋幽
詩人一任花俱瘦
只願民無菜色憂

藥畦梅

炎帝遺芳濟世珍園中百草讓先春調羹妙手
能醫國不說當年種杏人

盆梅

月團香雪翠盆中小伎能偷造化功長伴玉山
頽錦帳不知門外有霜風

雪梅

五出花開六出飛玉肌寒擁素綃衣更看霽月
同清白一夜窓前瘦影肥

月梅

素梅姑射鬪嬋娟
踈影分明不夜天
散却廣寒宮裏桂
春光長滿玉堂前

風梅

花間少女剪春寒
粲粲霓裳舞隊仙
月夜遙看環珮冷
莫教吹落玉花鈿

烟梅

夢隔梨雲逗曉天
苔枝浮翠泥春寒
不嫌玉質籠輕素
留與詩人冷澹看

竹梅

浪說松林有美人何如倚翠渭川濱
歲寒遮掩春風面一日可能無此君

照水梅

一泓映出兩南枝
髣髴明妝對鏡時
波面浮香天作底
芳魂浴雪影娥池

水竹梅

波涵脩翠月玲瓏
院落清幽自不同
冷帶湘筠浸踈影
一般瀟灑月明中

水月梅

淺碧籠蟾蘸玉痕
乾坤清沁鏡中春
黃昏照影成三絕
縱有花光寫不真

杖頭梅

玉肌橫影暗香飄
絕勝江行掛酒瓢
雪擁吟肩兩清瘦
一枝挑月過溪橋

擔上梅

蜂蝶隨人紫陌賒
挑將春色向誰家
若逢公子休輕售
不比街頭賣杏花

隔簾梅

庭花映箔眩吟眸一片湘雲鎖暮愁風捲黃昏
踈影動珊瑚枝上月如鉤

照鏡梅

銅瓶養素近粧臺一照芳心對面開應是嫦娥
厭丹桂換將踈影月中來

青梅

累累酸實釀餘春小摘枝頭可薦新之子深能
保貞固中含天地發生仁

黃梅

青子纔看遍綠陰轉頭紅綻又垂金未應功到
和羨妙更爲蒼生大作霖

鹽梅

熬波翻雪子青青鼎鼐同登要適鈞何代無賢
如傳說大羹不和味尤真

咀梅

細嚼詩脾玉液生詩脾冷沁有餘清靈均可惜
不知味却向秋風殄落英

玉笛梅

誰家玉管奏春風
吹落江花曲未終
黃鶴樓空
人不見一聲聲
在月明中

水墨梅

香銷南國雲愁地
影落西湖月暗箋
回首玉堂
春夢杳一池墨
雨起龍眠

画紅梅

一夜花房似守宮
丹青誰爲寫緋容
却疑卯酒
傷多後綃帳春寒
睡正濃

紙帳梅

春融剡雪道人
家素幅凝香
四面遮明月
滿牀清夢覺
白雲影裏見
疎花

中峯禪師梅花百詠終



金 淵 集

仇 遠 撰

本館據聚珍版叢
書本排印初編各
叢書僅有此本

御製題仇遠金淵集

宋末元初鳴以詩。早年仇白瑛已名馳。卻看排次還面目。仇遠在宋末。卽以詩名。其格高雅。往往橫視古人。世所傳惟興觀集。山村遺藁。及近時歛人項夢昶所輯。

山村遺集。其金淵集則不可復觀。故于永樂大典散篇中。真輯各體。編爲六卷。攷遠贈士瞻上人卷。僧道衍跋之。推挹甚至。蓋深傾倒于遠者。故其監修是書。所載固多。似全部遺者無幾。若有神物阿護者然。

爲護持。雄逸或堪蘇賦。伯仲清真亦偶陸。游。壘篋擬之李杜誠猶遠。則實淵源限代時。

乾隆乙未仲夏

金淵集目錄

卷一

四言古詩四首

五言古詩七十六首

後附六首一首

卷二

七言古詩三十六首

卷三

五言律詩一百二首

卷四

七言律詩六十三首

卷五

七言律詩七十八首

卷六

五言絕句三十首

七言絕句一百七首

臣等謹案金淵集元仇遠撰。遠字仁近。一曰仁父。錢塘人。因居餘杭溪上之仇山。自號曰山村民。世傳高克恭畫山村圖卷。卽爲遠作也。遠在宋咸淳間。卽以詩名。至元中。嘗爲溧陽教授。旋罷歸。優游湖山以終。遠初錢所作一編。方鳳、牟巖、戴表元皆爲之序。分教京口時。哀所作曰金淵集。吾丘衍爲之題詩。所謂仇仁父解秩建康。有新文曰金淵集者也。二集皆已佚。故明嘉靖中。顧應詳跋其贈士瞻上人卷。已有不見全集之憾。世所傳興觀集、山村遺棄。皆從手書墨蹟蒐聚成編。非其完書。近時歙縣項夢昶始采摭諸書所載。補輯爲山村遺集一卷。刻之杭州。而所謂金淵集者。則不可復睹。今惟永樂大典所載尙數百首。攷遠贈士瞻上人卷。後有洪武二十一年僧道衍跋。其推挹甚至。蓋深傾倒于遠者。故其盛修是書。載之獨夥。疑其全部收入。所遺無幾也。謹以各體排纂。編爲六卷。遠在宋末。已與白珽齊名。號曰仇白。厥後張翥、張羽以詩名于元代者。皆出其門。他所與唱和者。周密、趙孟頫、吾丘衍、鮮于樞、方回、黃潛、馬臻。皆一時名士。故其詩格高雅。往往頡頏古人。無宋末麤獷之習。方鳳序述遠之言曰。近體吾主唐。古體吾主選。瞿佑又記遠自跋其詩曰。近世習唐詩者。以不用事爲第一格。少陵無一字無來處。衆人固不識也。若不用事之云。正以文不讀書之過耳。其言頗中江湖。四靈二派之病。今觀所作。不愧所言。而此集出自塵埋蠹蝕之餘。皆項夢昶本所不載。若有神物呵護。俾待聖朝而後顯者。爲尤可寶貴矣。乾隆四十年四月恭校上。

總纂官庶子臣陸錫熊

侍讀臣紀昀

纂修官編修臣閔思誠

金淵集卷一

四言古詩

元 仇 遠撰

晨入東寺閱藏行香

明星未高。繁霜已肅。娟娟落月。猶挂茅屋。我馬遑遑。我車僕僕。晨入緇林。坐閱梵牘。字奇義奧。了不可讀。空玄無象。奚事耳目。簡書期程。軒冕桎梏。顧影自哂。未能免俗。名教真樂。言語穀粟。何時式微。知足不辱。

養鴈

離離陽鳥。其居朔方。鳩來江南。雪霜備嘗。意不耐暑。慮爾早亡。乃安水土。羽毛無傷。仰羨鷓鴣。俯趨鶩行。負影隻立。何時還鄉。秋風日高。稻粱已黃。且謀一飽。勿思翱翔。

野飲

土岡之西。竹樹之下。板屋三間。娛此隱者。罇有肥雞。廐有羸馬。豈無佳菊。采不盈把。且漉我酒。放浪林野。莫不飲食。知味者寡。

題徐壽畫牛

此大武者。二十八蹄。茂樹之下。豐草萋萋。牧童且嬉。夕陽未西。何如桃林。歸去來兮。

五言古詩

送高仲山通州教授

通州得通儒。善類蒙善教。如此老成人。眞足重學校。我昔客朱方。曾窺管中豹。言容旣篤厚。文字入玄奧。交游二十年。夷險同一操。閒居虎林麓。倚牕聊寄傲。忽承北斗敕。勇鼓來淮櫂。華髮映青袍。輕帆偃黃帽。天晴宜征途。芹藻春色到。臯比坐可暖。三載勤訓導。惜哉龜手藥。至老方取效。載酒游五山。何由共吟嘯。

送楊志行赴徽州教授

峩峩紫陽山。翼翼素王宮。中藏朱子書。頗有鄒魯風。在昔三十年。我嘗遊其中。一溪練帶如。環以千翠峰。朝嵐與夕霏。四景日不同。惜哉屐齒折。我舟遽云東。子今振木鐸。出爲斯文宗。諸生列館下。待問如撞鐘。明經別同異。析理開愚蒙。獨坐三鱣堂。教思傳無窮。庠序足眞樂。詩書有近功。行當自此升。豈曰難爲容。平生韓孟交。雲龍阻相從。願言壽道體。有書附鱗鴻。

下壽

六十本下壽。皤然成秃翁。繁舟貞女瀨。竊祿素王宮。暮隨太守車。朝迓御史聽。我馬劣難騎。卻與無馬同。老病厭徒步。足力亦易窮。將以馬易牛。歸耕田園中。聖人有遺訓。吾不如老農。

小園梅已綠陰忽見一花甚香

北枝綠陰繁。枝上子如豆。一花突然見。香壁苔蘚透。雖同梨雲夢。亦出桃李右。矜驕若自惜。終覺老而瘦。

昔占百花先。今處百花後。春風少年場。尤當敬耆舊。

答陳宗道見寄

寒子山澤臞。飄飄一鳴似。天風忽假便。飲此金瀨水。朝隨章句儒。暮逐副墨子。肯歎飯不足。可戀惟酒美。賦茅亦聊復。久矣忘怒喜。尾事曳塗中。人生行樂耳。懷人耿不寐。一夕三四起。江東暮雲合。渺渺隔秋水。遣我詩兩章。意古香粹美。敢謂義熙餘。及見黃初體。君閒恥食粟。我出慙爲米。流品曼不同。黃河貫清濟。

存耕吟寄姜景星

詳斗

吾不學老農。種此方寸田。善雨日培壅。安得荒旱年。詩書苗且舍。艾蘊毋蔓延。種固有厚薄。穫豈無後先。先疇畎畝在。後世兒孫傳。何憂換八百。奚止取十千。卻笑多牛翁。轉瞬無炊煙。我獨遺以安。本固實自堅。耘業待歲晚。韓公嘗勉旃。

插梅

偶得數枝梅。插向陶瓶裏。置之曲密房。注以清冷水。肌膚若冰雪。寒極粟不起。歲晏且聞香。春深看結子。示沈道人

有涯本無涯。後覺卽先覺。名利念旣輕。生死路不錯。棊枰幾勝負。只看末一著。寄語耽酒人。飲時自斟酌。懷白石社尊師道堅

我思南山陽。谷神何繇繇。松下笑相別。惚恍忘歲年。寄我猶龍經。文字入幽玄。終期白石頂。擊竹歌遊仙。

和子野見寄十二辰體

良工鼠鬚筆。戢戢囊穎露。鈔詩節經史。汗牛車載路。信知文中虎。一代人不數。細聲笑蚯蚓。妙趣忘魚兔。東野龍無雲。胡爲乎泥中。蟠屈如睡蛇。虛此雲夢胸。且騎款段馬。野服隨田翁。相羊山澤閒。眞樂樵牧同。開林斬猴杙。種花續春意。他年處雞窠。偃蹇增老氣。錦鯨卷不宜。貂狗續亦易。老硯磨豬肝。翰墨作遊戲。

和卞南仲子祥

吾友卞南仲。別我何忽忽。家有六男兒。乃與不死同。阿祥更穎出。聲聲有父風。翰墨旣瀟灑。文字猶研窮。西園蓋常飛。北海樽屢空。霜寒瀨水淺。蛟龍若爲容。我將歸西湖。春風入脩筇。期子梅花下。一酌孤山翁。

和張仲實見寄

天地有義氣。五行秋在金。風吹庭前樹。亦作清商音。游子初離羣。百感集一襟。諒予老冉冉。無復謠善淫。吾方用吾悟。安計他人心。古交色不變。百鍊如精金。一別又三月。書札乖嗣音。相望隔一水。離憂盈中襟。秋陽不能驕。秋雨不能淫。會面不可期。月明千里心。

和答蔣全愚韻

金壇有耆英。學博聲名早。摛奇薄莊騷。稽古極羲昊。君甚似樂天。稅冕居履道。息遊鸞駱馬。尙友敬胡杲。

我生六十年獨欠識此老來遊溧陽學文物委秋草黃沙昧人目忽見石皓皓君壇高難陟我壘虛易擣
新詩十八韻韻韻俱壓倒交情託以宣一字一大好自慙溝中斷未足被華藻但令小兒輩藏奔以爲寶
相望衣帶水波弱限蓬島玉石資盪磨鐘鼓宜擊考何由卽會面疑義共探討豈無問字酒可以濡吻燥
昔爲堅多節今爲科上稿窮達等醉醒何庸寬懷抱

和金沙蔣文海韻

干祿非良圖好遯實素抱昔爲駕壑松今作出山草茫茫海嶽隔冉冉齒髮老淵明書甲子拾遺歷天寶
迷途諒未遠貴在知幾早

我聞茅峯下曾有臥龍人風雲未承運淵潛聊自珍案賈誼甲辰原賦有湧淵潛以自珍語原本訛作淵潛今改正世無卞和氏誰辨玉與
珉緇塵化衣裳我獨潔其身攬鏡忽自笑奈此白髮新

海翁古徵士接武諸公後聞名三十年傾蓋卽如舊示我伐木章無能出其右簞籜秋竹竿坐睨蒲質朽
試問五兩綸何如一杯酒

昔我客朱方曾識三數公獨欠之句曲徧走山西東向來劉與王漫塘實齋疇能繼高風今我來金淵尸祝
素王宮閱人晨星稀見子夕照紅何當分鄰燭竹徑相與通

乙巳歲三月爲溧陽校官上府經烏利橋和陶淵明韻

一日不見山胸次塵土積老來志益壯清遊等疇昔鍾山草堂古每恨身微翮況是佳麗地牛馬風不隔

迢迢問征路。冉冉供吏役。淵明田可穡。肯爲五斗易。石橋跨淮水。岐路由此析。俗駕何時回。爲爾謝松菊。

爲金陵宗人賦雲谷詩

英英天上雲。洞洞天下谷。皎皎谷中人。精神皎如玉。卷舒一何心。怡悅亦自足。朝采孕丹砂。夕氣被林麓。豈無茯苓芝。隨春入鋤斷。自是長生苗。根本元不俗。三千年桃花。八千歲椿木。不如採藥歸。枕石伴雲宿。

西廂古檜和卞南仲韻

奇木有古意。愛古人亦奇。嘉禾老君觀。案老君觀。原本作老君觀。攷孟元嘉禾志。郡治西北有天慶觀。卞陵烈帝祠。二檜棟梁物。俱逐劫火移。竭來溧城西。見此鐵石姿。靈狸肯薦骨。死豹仍留皮。擊空有爪龍。踞地無角螭。三株兩失葉。簷溜傷南枝。僵立萬雪霜。坐更幾鄰儀。我將護赤欄。整以蒼石墀。深根直不朽。雅操堅自持。棟梁與薪樵。待用各有時。罔俾孤山樹。專美坡仙詩。

學舍自吟

金淵文學椽。旅食經歲年。石田薄有收。儘足裨俸錢。絲毫了無補。教養愧前賢。竹添講堂後。柳栽泮水邊。匏花粲籬落。藻帶舞瀟漣。土龍欲致雨。何能起雲烟。革帶孔漸移。老羶非學僊。木居士何者。求福真徒然。

送虞師憲赴延平書院山長

我師文靖公。李一傳子朱子。佩服中庸書。靜中識根柢。秋月湛冰壺。瑩徹無瑕滓。延平建精舍。盛德宜

世祀。君往坐臯比。文行成粹美。秋風送書船。南上二千里。好君來河幕。冷風爭劍屨。鳴道尋方表。則字

已俟九京如可作。文靖公亦喜。予友有黃功。敏子昔分教于此。頗知文風盛。十室九儒士。是行若登仙。劍氣炯青紫。只恐席未溫。思歸慕園綺。

題西梵一翁雙清軒

上人碧雲房。苔地不盈丈。古石六七株。修竹覆其上。石兄既奇秀。竹君亦高尚。歲晚永相依。訖不染塵埃。方參香嚴師。曾識牛丞相。解壺時一息。吾其得閒放。

山泉爲惠君疇賦

空青穿秋景。瘦白瀆夏雪。若非林下士。誰識此高潔。山中非無雲。蒼狗隨變滅。山中非無月。陰晴易圓缺。不如泉混混。萬斛常不竭。洗耳塵即清。釀酒香愈冽。一醉三十年。至味過麴蘖。翁意不在茲。勿爲醒者說。

梅夢

細梅眩晨霞。素梅迷暮雪。一翁著花間。冰霜殊皎潔。蜂蝶猶未知。香味老逾烈。夢中識歸塗。踏遍孤山月。
續夢

一夢續一夢。夢短寒夜長。顛倒無首尾。哀樂迷存亡。枕上忽自笑。歷歷見未嘗。至人本無夢。有夢其何傷。魚旆農夫喜。熊羆男子祥。吾年過不惑。夢覺久已忘。未來尙曖昧。既往空思量。不知邯鄲道。幾番熟黃梁。

柰花似海棠林檎。但葉小異。

東風擅紅紫。顏色分重輕。愛此柰子花。嬌豔何盈盈。未開足標致。紫綿煥垂纓。開繁臙脂褪。徐娘老而真。

俗稱爲海紅。結實葉底頰。林檎難爲弟。海棠難爲兄。我評此三花。同出而異名。一枝插銅壺。坐觀心目明。安得劍南樵。素縑爲寫生。

題仲賓竹石

淇園綠猗猗。昌谷黑離離。謫仙硯池底。苗此兩三稜。輔以小崢嶸。標度尤曠奇。願堅歲寒心。勿爲風雪欺。暢師同玉上人遊茅阜。

朝辭二竺寺。暮宿三茅峰。紅樹落一葉。白雲深幾重。遠遊喜無雨。清興尤宜冬。遙知天壇上。會與仙人逢。上人家海上。喜從名山遊。昔聞三茅君。隱在千峯頭。霜寒草木瘦。歲晚泉石幽。不見梁丘伯。使我心悠悠。

懷中
砥

夜醉

山翁醉如泥。夜半方醒然。既莫省宇宙。況復知歲年。閒愁置度外。大道在目前。日飲豈不佳。第恐無酒錢。題西山眞先生像

何年霜月子。寫此西山眞。峩冠褐寬博。詩書發精神。可以眞巖壑。可以登麒麟。斯人不可作。令我思乾瀆。客來驚睡

長晝清和時。惟有睡鄉美。宰予邊孝先。母乃今我是。門外有客來。推枕矍然起。請啜一盃茶。萬事且不理。

次韻蕭饒州見寄

漢傑時引年
卜居深里

至人本天游。上古惟野處。如何種菊者。亦勝封千戶。萬鍾且睡去。況復問阿堵。先生東陵侯。成敗久目睹。幾程上金臺。一節縮銅虎。肯從赤松遊。餐芝擊麟脯。溫故窮丹鉛。投閒棄圭組。自是橫江鯨。終然辭網罟。獨醒笑衆醉。此舉冠千古。二疏三高後。欲數指難僂。毋煩北山移。猿鶴當起舞。

昔寓南園居。日與蕘牧處。今營西郭居。官梅映牕戶。硯山如何博。尺度先畫堵。此計當勇決。結構須快睹。伐藤斷長蛇。臥石凍伏虎。山廚富笋蕨。客至當脩脯。野芳散紅紫。粲粲五雜俎。放懷山水窟。脫迹名利罟。平泉綠野堂。盛事追往古。願學樵夫拜。相從丈人僂。應笑趨炎人。奴顏入風舞。

過岳公靈故居

赤脚踏層冰。素蟾浴清水。可憐偷桃兒。竟以寒餓死。木瓢挂空壁。蠹册堆破几。有子如矮奴。踉蹌入城市。剪白鬚

臨鏡忽自哂。公然白紛紛。如稚女眼最明。爲我剪白鬚。影影如素絲。不堪綳破襦。參差茁秋草。蔓衍不可除。明知我已老。既白難再烏。無肉令人癯。眼昏妨讀書。顏駟燭之武。吾非斯人徒。

寄史貴質廷佳丁未同庚

溘祜六十翁。生遇時節好。朝遊漁樵社。晚入詩酒保。不爲名利縛。剛被花月惱。時發少年狂。未省身已老。強歌無餘懽。聞者笑絕倒。齒髮漸凋疎。形容頓枯槁。平生千金軀。豈不自愛寶。幸然本根在。收斂尙及早。何必大藥資。疋羸多壽考。也無政事堂。也無沙門島。

錢儒珍孫寶家賞桂

客至當飲酒。醉此金粟堆。秋風何時到。叢樹參差開。馨香逆人鼻。蓓蕾藏聖胎。攀枝折其榮。落種浮酒杯。後夜有佳月。弄影須徘徊。紅袖歌未終。畫角毋庸催。

涼風

涼風撼庭竹。起舞如翠蛟。亂葉打牕來。卷盡破屋茅。飛雲行太空。萬竅爭怒號。煩暑一掃淨。解我心鬱陶。

夜半見月

中夜月初上。照我東牀明。我心本無事。展轉寐不成。仰觀烏鵲飛。俯聽蛩螿鳴。念適從何來。衣食非素營。三年然後歸。兒女各長成。婚嫁願早畢。吾其師向平。

與楊志行、郭斗南、馬德潤、屠存博、呂公弼、僧義慶游鍾山。以峯多巧障日。江遠欲浮天。分韻。予得浮字。

昔讀寶公傳。今作鍾阜遊。緩行萬松間。直上千峯頭。古塔表木末。寒泉貯巖幽。遙觀江流奔。始知此生浮。甚愛雪竹庵。逸駕吾將休。

試涪翁題鄭飲硯

我有古鏡硯。肌理細密勻。云云散角痕。巨口細魚鱗。涪翁銘其背。文字極雅馴。鄭飲彥相者。不知何如人。回首數百載。想見元豐春。晴牕試磨洗。墨舊兔穎新。攜歸供行齋。侑此金石身。

蟋蟀

蟋蟀一何多。曉夜鳴不已。居然聲相應。各爲氣所使。零露聊飽蟬。落葉才庇蝮。秋風滿庭砌。安能久居此。愁聲不欲聽。我聽差可喜。平生勝負心。一笑付童子。

郊行集句

今日我重九。東坡無錢對菊花。杜陵昨夜雨鳴渠。東坡既雨晴亦佳。杜陵出郭望西郊。杜陵山林迹未除。杜陵顧憂斯人飢。東坡僣仆亂如麻。東坡淵明胡不歸。東坡吾居已及瓜。東坡豈無一尊酒。東坡誰敢負年華。東坡聊爲山水行。東坡玩奇石路斜。六坡一門生與兒子。東坡邀我至田家。然留連向暮歸。樂天爛醉是生涯。杜陵

種菊

鄰舍送我菊。惜無盆盎栽。分種東籬下。倚牕日裴回。初看蓓蕾青。黃蘂參差開。霜後苦無花。老眼生塵埃。得此少自慰。可以薦一盃。更用數日晴。南枝須有梅。

菊軒吟爲劉君章作

大江秋風高。紅葉紛滿地。采采黃金華。專此秋富貴。主翁庭宇靜。霜日自清媚。豈不懷淵明。異榻同夢寐。春融桃李門。一粲開落易。願言堅晚節。香淡有真意。平生觀物心。飲水知秋味。敢問楚人醒。何如晉人醉。

通甫弟歸里詩

霜重江水縮。艤舟江之涓。子今戒行色。予亦數歸期。已迫葵丘戍。何求買山資。酌別苦無酒。乘粟供妻兒。

風雨不出

儒官少公事。閒坐如家居。閉戶聽風雨。重讀架上書。豈無借書瓶。小酌勿用沽。豈無苜蓿盤。園丁送嘉蔬。溪童把釣竿。時得徑寸魚。采薇拾橡栗。視此已有餘。懷哉天地恩。不棄無用儒。舍此將何之。狂士多迷塗。終不如歸田。一蓑溪上鋤。

漫興

驢鳴有何好。晉人多愛之。胡不大堤上。隔花聽馬嘶。胡不茅屋下。帶月聽荒雞。我疑古之狂。矯世本尙奇。蠟屐柳下鍛。結髻劔首吹。端是味無味。以待知者知。滿腔浩然氣。抑鬱無所施。引頸一長鳴。萬里風雲悲。敢問駟與驄。立仗夫何爲。

九日鄰翁招飲

佳節喜新霽。作意登南山。茲山雖不高。亦足供躋攀。平明放舟出。日暮騎馬還。行止不自由。寸步千里艱。北隣朱公子。言笑破旅顏。相與一樽空。徒得半日閒。人生各憔悴。仕路復閒關。六十始平頭。甲子須循環。粲粲黃金花。才見秋一斑。忍以髮膚脆。犯此風霜頑。何如歸去來。期我巖壑間。

戒飲

腹無貯酒腸。小飲輒大醉。醉餘嗽卽作。痰唾連涕泗。酒亦有何好。上策當自治。無錢賒不來。不飲特易事。何如飯蔬食。飽矣曲肱睡。莫笑我獨醒。中有至樂地。

飲少

此中無他腸。飲少乃輒醉。眼眩力不支。便欲投牀睡。頓空名利心。願棄人間事。淵明千載上。當復知我意。

有懷雙子敬子中

兩龔昔所慕。二難今是似。簞瓢魯儒生。衣冠楚君子。相期歲月永。不爲弓旌起。極目暮雲平。脩筠恨予倚。

和子野

少年挾英氣。開雞慕劉祖。老來臥蝸牛。風雨懶出戶。酒空薪炭盡。景況詎堪睹。自嘆衫袖短。豈曰不善舞。此日始生日。避喧作溪行。出門阻風雪。僕瘁馬亦驚。歸臥春一牕。隔牕聽雪聲。擁衾守藥鼎。客至慵出迎。顏色日已老。何由得青精。未能歌雪兒。聊復呼麴生。夢中遊西園。一壺梅下傾。

報恩寺權公方丈

金淵多寶地。此地殊幽深。一錫得安穩。豈必棲山林。臨池照佛面。見竹空人心。江楓千百年。時作海潮音。昔康節先生題安樂窩詩中云。樂見善人。樂聞善事。樂道善言。樂行善意。此卽吾友朱仲明樂善齋之意也。繫之以詩。

人生有至樂。主善以爲師。善端本固有。樂處亦自知。我思舜之徒。雞鳴日孳孳。簞瓢在陋巷。顏氏其庶幾。之子芝蘭室。書傳爲箴規。量力行好事。困窮無妄爲。何似安樂窩。受用堯夫詩。

予久客思歸。以秋光都似宦情薄。山色不如歸意濃。爲韻言志。約金溧諸友共賦。寄錢唐親舊。

案此詩原

本無不字韻一首
無可校補

自我來溧陽。四見木葉秋。泮宮久敝漏。量力完且修。幸然土木備。及此工役休。巍巍大成殿。勢與鄒魯侔。聖賢日云邁。可以遺象求。捫心了無作。一掃築舍謀。咫尺三茅山。乃獨欠此游。且須歸去來。速爲營菟裘。迢迢滄水上有亭。曰寒光。水天散鷗鷺。四望山蒼蒼。向來于湖翁。詩詞題屋枋。幾思一遨遊。歲月飛羽忙。聞有白龍寺。石塔標鐵梁。老僧頗能吟。年來曾遊方。須乘未歸前。秋晴呼野航。我非章句儒。亦非漁樵徒。少年逞麤豪。提筆賦兩都。老尙著儒冠。卻悔識之無。旣難棲山林。又倦遊江湖。一官僅供口。康濟不在吾。秋風方戒寒。正道日荒蕪。行矣且歸耘。寸田聊自娛。

江海寄孤篷。飄飄一鷗似。汲汲謀稻粱。欲去行且止。淵明真達者。解印如脫屣。五斗何足云。可但折腰恥。我嘗慕其人。出仕亦漫爾。客行入歲晏。田稼逢水毀。逝者旣如斯。吾屬可去矣。肯負白鷗盟。西湖釣秋水。早從方外遊。志不在婚宦。采薇陟西山。采藻涉南澗。拄杖僅過眉。短衣不掩髀。一爲火宅累。漸覺有憂患。難任臣朔飢。俯就博士慢。大勝國子師。三年復藜莧。棲遲行路難。堅忍爲客慣。昔爲泛泛鳧。今爲嗷嗷鴈。幸免蠶楚慮。官事粗易辦。曷不歸孤山。梅花臘前綻。

秋空不肯明。風雨滿荒城。田父遮我說。重九最喜晴。此日晴色好。大田足西成。一冬暖如春。絮炭價亦輕。我雖將去官。于人獨無情。去年治城叟。下南仲采菊餐其英。今茲隔存歿。使我心怔營。出門悵誰語。卮酒

當自傾。

威鳳巢深林。神龍潛巨壑。泥塗困螻蟻。城市防彈繳。小草不自貴。已鑄出山錯。豈知甘苦淡。有味俱不羈。霜降水澤枯。歲晚木葉落。榮枯識寒暑。是非悟今昨。不見粘壁蝸。甘以退爲樂。二休行且三。可但耐辱莫。去郭十五里。翼然屏風山。上有看經院。創始昇元間。山潤易生雲。竹嫩未作斑。登高佛閣小。四面青回環。空門事彌多。永日僧不開。歸徑路委蛇。班荆履屨顏。信美難久留。道遠足力慳。遙知故山月。問我何時還。喬木足秋聲。紅葉表秋色。因之念湖山。恨不生羽翼。形留神已馳。游倦交漸息。西鄰夜砧發。東鄰曉機織。我亦有敝廬。松菊暗荆棘。北山百年墓。苦竹手所植。今長尺若干。霜雪頗自力。西風龍蛇蟄。暗雨山林黑。東望會言歸。免我長相憶。

七十古所稀。我今六十餘。干時本無策。謀生術尤疎。就食泮水宮。學圃乏薪蔬。凜凜座無氈。踽踽出無驢。厭厭尊無酒。啾啾食無魚。官居古云冷。已矣當歸歟。緬懷二女子。夫家住桐廬。三年千里別。曠久不得書。日者遣一力。還家問何如。江濱桐君山。土肥藥堪鋤。山根有閒地。或容房客居。

未仕每願仕。既仕復思歸。了知歸來是。宜悟求仕非。干祿本爲貧。原非慕輕肥。己昧好爲戒。復貽素餐譏。時艱士失業。十家九寒飢。豈無禹稷思。力薄願乃違。吾門可羅雀。載酒人來稀。下考劣己書。歸心疾如飛。眷言長途馬。老矣思脫鞵。晝短歌意長。式微兮式微。

人寄天地間。官爵寄所寄。所寄本儒來。得喪亦常事。何哉淺丈夫。以此芥胸次。達人視爲輕。譬彼搏菟戲。役滿須過更。代者乃未至。故鄉隔太湖。一舸歸甚易。秋高山骨露。始見松竹翠。依依古梅村。是中有深意。

遊子悲凜秋。秋盡行當冬。雨露變霜雪。寒色日以濃。豈無紫綺裘。綻裂誰與縫。不如早還家。山林專素封。掃松棲霞嶺。結茆慧日峯。山南與山北。春風入脩筇。時止可以止。道隆從而隆。抱膝且長吟。吾其師臥龍。

盆梅

有客送苔梅。來自馬臚裏。斜枝巧盤折。的皪數十莖。意欲媚春風。寧免少屈已。獨憐鐵石腸。竟作柔繞指。他鄉忽一見。少慰空谷喜。何當解其縛。條直有妙理。幸不入俗眼。入俗梅亦恥。

居遊行寄費廷玉大振

繁華錢塘郡。佳麗金陵州。吾生抑何修。兩地得居遊。杭也數年別。昇也幾月留。鍾山草堂靈。林壑殊清幽。開牕眺龍灣。大江日東流。鳳皇非故臺。不見白鷺洲。冶城塚纍纍。青溪波悠悠。長干塔尙在。瓦棺閣已休。雨花峙巖巔。錦石爛不收。層樓天下無。結構如龍舟。六朝王氣歇。故籓成荒丘。至今秦淮上。尙聞商女謳。山水如此佳。見有此客不。懷古復思鄉。日落川雲浮。惜無老樊川。酒酣吟杜秋。杜秋原本作杜秋。今據杜牧樊川集改正。

雪

忽驚小牕白。開戶雪如此。去年臘前無。一白從此始。霏霏甚可愛。落落勢未已。炯炯眼界明。沾沾田畷喜。靜聞野雁吠。立見蟄鱗死。鼓腹飽可期。勿畏寒墮指。窮檐絕煙火。閉糴三日矣。開倉糴官糧。太守如父子。

六言詩

送陳相士

相色不如相形。相形不如相骨。詩脾納此清氣。書眼了然明月。燕臺千金方市。楚畹衆芳未歇。試問毛遂先生。誰是白眉黃髮。

金淵集卷二

七言古詩

立春

山城歷日到每遲。新春殘臘俱不知。若非一鞭醒寒夢。梅柳爭春無了時。牛刀小試東風手。目中全牛果何有。勾芒昇歸古廟中。官吏升堂酌春酒。

竹素山房小飲。南徐唐正方善歌。吳伶以長簫和之。客以鳳凰臺上憶吹簫分韻。予得臺字。

少時閉簫白玉臺。一曲未終丹鳳來。金瀨空明秋水淺。妙香久不聞蓬萊。吳下老伶燕中回。能以北腔歌落梅。紅塵箏笛耳一洗。便覺篋憤抑琵琶哀。朱方臚仙古音律。宮長羽短隨剪裁。小春梅柳參差開。肯待羯鼓花奴催。我輩鍾情忘爾汝。濁醪妙理惟醲醅。晚風吹寒夕陽下。有酒不飲令人咍。今人青眼映山水。古人白骨生莓苔。不如相聚常銜盃。嗚呼五公七相安在哉。不如相聚常銜盃。

北園賞梅

梅花先受東君知。一晴開徧南北枝。吳姬持盃勸客醉。已恨賞花三日遲。主人惜花不惜酒。自摘一枝春在手。大開笑口問東風。金谷幾人曾白首。

題王師尹所藏三峽圖

上有趙明誠諸公題

廬山石橋天下奇。奔湍赴壑潛馮夷。倚闌俯瞰毛髮竦。品題曾讀坡仙詩。畫師筆幹造化窟。豈必夜半夸娥移。蜀天茫茫千萬里。彷彿猿聲亦如此。何當譜入朱絲絃。水底魚龍應洗耳。

題季路負米圖

高堂有親今老矣。孝子晨昏奉甘旨。傷哉貧也敢辭勞。百里迢迢親負米。後來列鼎坐重裯。積粟萬鍾不逮親。古言周急不繼富。爲母請粟非無人。

題范諷卿愛山吟境圖

前山排闥如虬奔。後山擁壁如虎蹲。三間茅屋白雲裏。一羣野鹿青松根。世上好山誰不喜。紗帽可能長隱几。詩人見石猶下拜。况是孤高有如此。終南捷徑從渠行。少室素價原非輕。呼童下山汲清冷。我欲洗耳聽猿聲。

送屠存博教授回虎林

雙鶴翩翩溧水陽。紅塵不染素衣裳。一歸華表飲風露。一住滄洲謀稻粱。湖海波濤多起伏。爭食那能效雞鶩。憂然長唳楚天寬。有日相從逐鴻鵠。

草蟲圖

昨夜南山雷雨霽。蟄室初開百蟲起。草天菜秀蒲柳長。生意森然隨氣使。陰陽變態足纖巧。分得餘妍歸畫史。野蜂採蜜花房裏。官蛙瞠目莎池底。案官蛙原本作宮蛙。今據晉書惠帝本紀改正。紛紛蚱蟻肆跳梁。款款蜻蜒齊點水。天牛

穴桑奚其天。鬼蝶迷花聿如鬼。血國三千亦有蚊。黍馬十萬寧非蟻。蝸虎那能捋虎鬚。蝸牛誰堪執牛耳。蜚蜋轉丸誠小巧。螳螂搏輪非勇士。鳴蟬嘶熱蟋蟀吟。一片繁聲愁客子。春風郊野豈不樂。籬落秋風又如此。坡仙舊詠只八物。若見此圖心更喜。我摩老眼爲題詩。晴日一牕蠅撲紙。

元夜嘆

虎林城中正月半。十萬人家燈燦爛。溧陽風景方放燈。通宵不禁人遊翫。大雪深寒萬木僵。家家冷坐無薪炭。典錢買竹又買燈。糠油結凍點燈暗。豪民張燈喚歌舞。鼓笛喧轟夜忘旦。忽聞買絲造海船。府檄專令豪戶辦。倉皇且救火。然眉縱有華燈何暇看。老夫掩關擁爐坐。一盞青燈置書案。良辰樂事恨難并。頃刻歡聲作愁嘆。蘇公買燈狀。陳子題燈詩。癡兒駭女知不知。月明月暗反覆手。且願麥熟休王師。

雪後祈晴

閏正月過二月來。溧陽溪頭花亂開。濃雲急雨洊雷電。不待羯鼓花奴催。江南天氣全然別。昨夜清寒今日熱。東風忽轉西北風。吹作霏霏一天雪。艷桃穠李睡海棠。顏色頓減仍減香。燕鶯羞澀未出谷。惟見野水生渾黃。晝夜交流已登岸。邱麥畦蔬根浸爛。州官憂水復憂民。明日祈晴泰清觀。

送劉鍊師歸井

鄱陽劉君佐。儒家子。偶儻有立志。壯欲囊書叫關爲時用。天長翻短。未能奮飛。乃著道士服。薄遊南陬。棲九疑之雲。釣三湘之月。相攸庵止。擬他日龜藏計。宿留十年。然後歸故里。再轉溧上。師式

玄宗俯仰方圓。不尙街纛。衣冠高潔。炯如玉雪。頗厭出塵入塊。無意于人間事。將俟我乎岳之麓。湘之濱。予喜其勇決高蹈。庸贈以言。君佐讞定而志不分。年盛而材有用。與其之南。何似之北。九萬雲程。勗哉進步。君佐名輔漢。

雲中雞犬隨淮南。手攀桂樹歌小山。鴻寶秘書在玉枕。有高尙者遺童顏。卯金家世學仙子。半生遊山磨履齒。懶耕白雲。有號耕雲種瑤草。南去持竿釣湘水。天風環珮滄江東。鄱雲深雨分鄰封。浮邱洪崖未之見。擁腫執掌常相從。拂衣浩然有歸志。湘濱已卜誅茅地。寸田尺宅可治生。騎鶴纏腰非易事。不如且向金蓮遊。濯足萬里黃河流。上界神仙足官府。山中宰相輕公侯。人生得意無南北。蠅利蝸名等雞肋。道人一粲據槁梧。世間萬事槐安國。

寒食遊陳園

梨花李花白鬪白。桃花杏花紅映紅。疎籬曲徑錦步障。聞以巨竹青玲瓏。獨木爲橋人不渡。柴扉欲鎖春風住。豈知野禽浪蜂蝶。時復銜花過牆去。春波漲綠春日晴。柳下扣門稽喜迎。池邊亭上少盤礴。坐牀指點呼麴生。冷官况逢寒食節。客味淒涼那可說。殘盃冷炙何處無。樂意生香聊自悅。清明天氣晴更佳。山林川谷多鶯花。後庭遺曲少人唱。踏歌椎鼓爭喧嘩。笑折一枝花入手。樹猶如此人能久。六朝舊事付東流。醉翁之意不在酒。

月琴吟贈程禹仲

我月太古色。我琴太古音。色見音聲求。焉能知我心。月到茅亭夜亭午。據梧坐看胎仙舞。本無圓缺無虧盈。心迹雙清遊太古。笑渠空向廣寒遊。記得霓裳羽衣譜。

應平叔送牡丹詩

草玄亭前老侯芭。贈我鞞紅三朵花。一春風雨塲麥麻。天香何事來山家。且勸花王一盃酒。更祝花王千萬壽。洛陽名苑今在否。未必開花大如斗。有花可賞不負春。紅紫轉眼俱成塵。酣歌誰識李翰林。酒樓柳絮愁殺人。

德輿集志道字士心葬母于銀山丹井之上作丹泉吟

葛公學仙丹有泉。葉公藏母丹泉邊。泉流瀦瀦亂石底。丹光炯炯長松巔。陟彼岵兮瞻望母。麻衣土枕常廬墓。難將寸草報春暉。祗覺煮蒿泣秋露。男兒眼中非無淚。有淚徹泉無厚地。泉聲如咽淚如丹。何待洩融歌大隧。幽花淡月耿墓門。不招仙魂招母魂。子規一聲蒼石裂。白雲渺渺山昏昏。

題沈子和德冲畫龍

紅霞飛盡玄雲同。深山大澤生春風。震雷一聲蟄戶啓。老龍天矯生蒼穹。憶曾鱗舟垂虹外。舟子傳呼黑龍掛。須臾急雨暗吳淞。昔見真龍今見畫。江南久旱草木空。湖水陡落如秋冬。蒼生望覓心願願。阿香喚起隆中龍。

送春寄友

老翁欲作送春詩。借問春去將何之。連朝醉不省人事。昨夜春歸更不知。客裝欲趁春歸去。家在西湖綠陰處。青青竹筍白白魚。也勝客中常茹素。杜鵑吻血啼未乾。髮白易黑留春難。冶城翁定有新語。棟花風急生餘寒。

贈溧水楊老

浙間筆工麻粟多。精藝惟數馮應科。吳昇姚愷已難得。陸震楊鼎肩相摩。我遊金淵飯不足。破硯生苔塵滿口。毛錐自笑不中書。白髮紛紛老而禿。中山博士屠存子墨卿。貽書薦至楊茂林。里儒大半習刀筆。耳聞竽瑟誰知音。善刀而藏歸勿出。博士校書行有日。定當致汝數百枚。東坡有云北方無此筆。

贈筆工沈秀榮

吾家歛石鋒芒出。不但挫墨亦挫筆。老懶作事苦不多。一筆纔供兩三日。近知沈子藝希有。洗擇圓齊易入手。不論兔穎與羊毛。染墨試之能耐久。禮樂三千成昨夢。禿筆何止十八瓿。長槍大劍正當時。毛錐子者直安用。金淵萬家籍百儒。學書用筆人豈無。管城欲重連城價。請攜椽筆遊江湖。

醉醒吟

衆人皆醉我獨醒。衆人皆醒我獨醉。先生何苦與世違。醒醉之中有深意。或云酒是腐腸藥。沈湎淫泆無不至。或云酒是忘憂物。醉鄉別有一天地。左拍五柳先生肩。右把三閭大夫臂。醉時元自惺惺著。醒來亦自齁齁睡。獨醒獨醉豈多得。衆醉衆醒堪一喟。醉者自醉醒自醒。卿法吾情各行志。溧江美酒差可戀。說

醉論醒姑且置。公不見昔人有云。且食蛤蜊那知許事。

謝秋澗沈君瑞爲予寫真

山村道人今老矣。徒有虛名落人耳。夢中誰記版築夫。畫像雖多終不似。偶來招隱九鎖山。隱侯試筆開生顏。鬚眉口鼻宛相肖。只今置之泉石間。聞君尤工畫山水。萬壑千林生筆底。可能更掃隱居圖。布襪青鞋侶樵子。

夏雨歎

六月溧陽三日雨。山田喜足低田苦。學中亦有北鈴圩。低處水深三尺許。秧苗浸倒根已浮。再種何由能入土。老夫寓居西郭外。厭聽村村驅車鼓。唇焦面黑嗟農夫。此生悔不業樵漁。有山可采水可釣。免得曉夜憂耕鋤。去年一熟才了逋。今年再熟方始舒。豈期不待稻花白。併隨荇藻歸江湖。溧陽近與丹陽接。不雨由來三數月。河流淺澀田乾枯。練湖放水通舟楫。人間既是寒暑同。天上何爲雨暘別。願移此雨慰彼心。還我朱明作炎熱。

州廳設醮卽事

去歲今朝六月六。暮雨傾盆風拔木。今歲公字醮祈晴。晝日當空生暑溽。羽士宣詞宮吏拜。燈燭煒煌香馥郁。須臾黑雲西北來。如蓋如輪覆廳屋。電驅霹靂掣金蛇。蒼溜奔騰瀉銀竹。幃屏掀開旛幢飛。卷盡香灰吹滅燭。天威震怒莫敢喘。謝罪怔營虞喪瀆。少焉雨止涼颼颼。天氣如秋失中伏。四郊大田多黍苗。一

片瀟湘接湖洲。村夫中庭涕泗下。歸聞野老吞聲哭。只恐戢戢生魚頭。何止廣文飯不足。天心仁愛子勿憂。府公移文行賑粟。古言大雨不爲災。雲雨須臾手翻覆。

荆溪橋

荆溪滔滔向東注。長橋束之川后怒。英風颯爽白晝曷。此是孝侯斬蛟處。案周處謫孝侯。原本說孝侯。今據晉書改正。下同。客船逆上帆下檣。何如懸水泝呂梁。百篙攢石雙檣健。逾退咫尺千丈強。我來偶值凍雨作。且近孝侯祠下泊。平生忠孝侯所知。世途更似風波惡。

七月丙辰迎士山龍王入郭

秋陽皜皜人皆苦。安得清風掃殘暑。河流欲斷泉脈乾。一望高田變焦土。洮湖白龍迎入城。行道燒香入亭午。青天已響阿香車。平地未見商羊舞。昔時曾說雨催詩。今朝還要詩催雨。願龍速施神力澍甘霖。萬落千村熟禾黍。

諭馬

白公有馬不肯騎。東西徒步足力疲。吾兒有力駕馭之。兀兀馳驟那敢嘶。爾馬亦似欺我老。乘駟乘聽非不好。老翁自愛下澤車。放爾春郊飽青草。

秋雨

杜陵昔日歌秋風。卷去屋上茅三重。村翁今夜嘆秋雨。衝倒簷前墻數堵。瓦傾棟撓直見天。寒侵素被不

得眠。相如家徒四壁立。我比相如尤可憐。錢唐近報融風起。瓦礫塵埃半城市。霜餐露宿人遑遑。衣食難謀。況居止。呼童向曉收簾蘆。補籬織箔聊枝梧。雨飄有限行且止。秋陽餘暖留桑榆。嗚呼。居得一日且一日。丈夫安能事一室。

寄南仲

坡翁昔年五十二。翰林侍讀爲學士。溪翁年德與坡同。官職胡爲未相似。我道閒人勝貴人。儒來軒冕溪雲比。翁今田園瀨水上。頗勝求田陽羨里。翁今有弟夜雨對牀樂。頗勝卯君懷遠驛。中有感秋風起。有時簾牀茶竈泛洮湖。柳外梅邊從徙倚。詩筒經卷靜工夫。光景流連一彈指。不論衆醉與獨醒。不問此非并彼是。客來不必及時事。有酒且斟無卽止。從今笑傲五百年。銅狄銅駝皆敝屣。小山老桂敷秋香。下弦月照西風涼。今夕如此好風月。胡不招邀坡翁霞佩同顏頰。翁今放舟何所適。新詩漫表長相憶。舟中不可久留兮。盍早歸來共賦碧雲餐白石。時生日出
遊客

留飲篠塢承隱君山莊

夾山崢嶸相對起。貫以盈盈衣帶水。白雲深塢碧篠合。華屋盤紆蒼樹裏。二三隱者古衣冠。魚酒招邀極歡喜。維舟岸曲信宿留。惜別依依行復止。東南風順帆上桅。一轉瞬間行十里。人生交契無故新。他日停雲從此始。

菊

楚澤秋高衆芳歇。眼中見此霜下傑。南牕粲粲八九株。淡白深黃顏色別。自笑背時難獨立。恰是重陽過一月。丁寧女子莫摘殘。留伴梅花傲冰雪。

和李致遠

深君秀才

平生志氣隘九州。直欲濯足萬里流。詎期功名坐蹭蹬。不意歲月成繆悠。防閑擬鑄鐵門限。牽挽忽作金瀨遊。棲巢未穩烏鵲月。歸夢已熟鱸魚秋。連宵風雨正僵臥。何時林壑容奇搜。可人喜接一日雅。此地拚作三年留。說詩解字屢握手。感時懷古頻搔頭。吳郡才子止邱沈。梁園舊賦餘枚鄒。天上仙應無惜者。眼中客復有此不。家聲久識南北阮。筆力眇視大小歐。我方得友頗慶快。子亦固窮忘怨尤。蹄涔乃使鯨鯢伏。拳石難與嵩岱侔。紛紛嗜好異齊瑟。磊磊肝膽呈吳鉤。有才未遇政何損。知爾不薦終當羞。往事欲談遽易了。濁酒旣傾焉得愁。平乘樓上王夷甫。下澤車中馬少游。須笑卽今仕宦人。嚙喙言貌如伶優。若爲田園足以活。與爾水火無相求。一瓢陋巷誓不出。孤雲野鶴心自由。斯文將興天未喪。游子纍纍徒隱憂。

九日客中

菊糕萸蟹年年有。未信今年此地無。一瓶新釀正三白。幸是杖頭錢可沽。客況淒涼宦情薄。釜欲生魚門羅雀。未能早賦歸田園。白酒黃雞差自樂。戶曹司馬村校書。相呼徑詣黃公墟。滿頭插菊把茱萸。強歌強舞醉相扶。何必更畫幽風圖。

壽星相

西方長庚今我是。東郡短人豈兄弟。脩眉班首頂如雲。購衣裳猶楚製。翩然來遊太平世。市上小兒驚且睨。身外不須重鶴鬢。一粲人間八千歲。

曉雪

昏昏慘慘牕映月。索索颯颯風吹葉。青童開門忽驚笑。昨夜庭心一寸雪。東方日出雪漸融。簷花滴滴皆春風。山村布被正酣臥。愁殺門前賣炭翁。

兩雪閉關。子野、公明、仲祥載酒遠慰。晚以詩見寄。和答。

案此詩第二首內稱四詩仙。而題中祇三人。無別本可校增。姑仍原文。

溧陽三日雪平地。城市十家九家閉。官舍無氈冷徹骨。省事正宜尋老計。小人自不知紀年。我久忘吾豈忘世。出門無礙將何之。已拚食貧了三歲。深雪沒履寒徹綿。誰子扣門四詩仙。袖中黃絹盡白辭。塗抹既醉鼻驚篇。我非不納學泄柳。政爾欲眠如孝先。忘形爾汝子勿怪。坦率從來六十年。

金淵集卷三

五言律詩

丁未元日

花甲喜循環。風霜變老顏。開身留汴水。歸夢滿湖山。雪凍蟪應避。春暄鴈欲還。桃符隨手寫。禍福不相關。

臆外梅方開

淡月江南樹。香奇影亦奇。春前十二月。雪後兩三枝。冷蘂疎堪數。孤根穩不移。西湖老仙宅。清夢夜何其。

正月二十四日送康使出郊

聞騎羸馬出。遠餽繡衣行。愛此川原迥。欣然風日晴。隔離梅半落。斷隴麥初生。每恨徵官縛。茅川負夙盟。野店當官道。村醪喚客留。偶因乘早出。故作探春遊。芳意林梢靜。晴光水面浮。人言有龍洞。近在石山頭。

聞楊大受凌吉叟吳次山諸友訃音有感二首

落落霜餘樹。疎疎曉後星。經年才契闊。故友半凋零。有夢懷風采。何人作墓銘。老孤無眼淚。空望浙山青。少長皆吾友。相期滿百齡。生分青白眼。死隔短長亭。蔗本身爲幻。藤牀夢是醒。中山醪酒在。且醉學劉伶。

孫康侯北歸

淮海十年別。北歸今幾時。鏡中無舊髮。囊底有新詩。每恨爲官縛。翻令見面遲。清都遊歷事。還許俗人知。

夢得墨四片。一差短。戲呈廷玉。

昔賢曾夢筆。夢墨定何如。應使山中隱。重研世上書。磨人驚老大。飲汁笑空疎。長短無庸較。三螺已有餘。
陸雲得石墨數十斤。送兄三螺。

四月十六夜月蝕

盛服拜清夜。中庭朝太陰。凡來仰天者。俱有愛君心。目斷山河影。耳聞鐘磬音。還光俄頃易。涕泗漫沾襟。

送田道士歸茅阜

我愛孟東野。君師田子方。放舟遊瀨水。飛鳥返華陽。有酒須同酌。真情不可忘。仙源橋下徑。何日共徜徉。

廉公子家藏玄石。名武夷春雨。

至寶忽橫道。峯巒高復低。數尖靈壁石。一曲武夷溪。黛色春浮玉。黃流雨曳泥。遙知千載下。名與峴山齊。

醉聞杜宇

家家酒似池。日日醉如泥。海燕聊爲客。杜鵑何苦啼。狂那知帽落。歸不爲花迷。信筆成詩句。苔牋小草題。

移牀詩

莞簟輕輕卷。藤牀故故移。暑塵無避處。客舍有涼時。開帳迎風易。鉤簾看雨宜。綠陰更清絕。舊竹長新枝。

長晝

閒官少公出。長日足高眠。律已惟三尺。埋頭又兩年。雖無乞米帖。安得買山錢。莫聽閒唇舌。行藏任老天。

處暑後風雨

疾風驅急雨。殘暑掃除空。因識炎涼態。都來頃刻中。紙牕嫌有隙。執扇笑無功。兒讀秋聲賦。令人憶醉翁。
閒步

村徑桑麻合。扶筇信所之。綠陰晴冉冉。白日步遲遲。野繭粘高樹。山雞入破籬。豈無款段馬。常是小兒騎。
鼓角

五更相次曉。一曲有餘清。忽醒山林夢。遙聞鼓角聲。背風還迤邐。帶月最分明。莫作邊城看。長淮久息兵。
六月雨

驟雨忽終日。高田知有秋。斜風驅溽暑。平地作交流。屋漏忙移坐。泥深懶出遊。美哉今夕睡。涼意已浮浮。
鴈

四郊皆積水。鳴鴈一何多。隨處沙頭宿。常時月下過。弟兄求口食。羈旅困風波。寄語支更者。蘆深有網羅。
新秋

雙星方卜夜。載宿已交秋。未覺炎涼改。先爲草木憂。鴈來催燕去。火老讓金柔。阮籍知何事。江東尙滯留。
秋感

明朝交白露。此夜起金風。燈下倚孤枕。籬根語百蟲。梧桐何處落。杼柚幾家空。客意驚秋半。炎涼信轉蓬。
蛩依莎底露。螢墮樹頭風。秋已來多日。人誰念二蟲。火流函月應。雲散楚天空。搖落年年事。吾生鬢亦蓬。

八月二十三日三溪書房賞桂二花

二花香更烈。不與一花同。會記和雲折。惟愁著雨空。舊遊明月窟。古意小山叢。十日中秋過。潭疑秋未中。

冷坐

冷官宜靜坐。借屋近荒村。無酒可延客。未昏先閉門。水明知月上。木落見梅尊。滿目淒涼者。相逢不必言。

抱膝

抱膝坐終日。澹然忘是非。縱令官未滿。已與世相違。古道平蕪合。誰家新燕歸。年荒煙火歇。空老一山薇。

七月梨花

紫薇紅槿外。忽見此花嬌。縱被秋陽暴。何愁香雪消。夢回雲冉冉。春遠夜寥寥。魂隔梧桐雨。時吹玉笛招。

和卞仲祥

我愛中秋月。行歌荒野中。亂雲催薄暮。喬木易高風。鏡裏花難折。樽中酒不空。南飛有烏鵲。未見北來鴻。

和黃晉卿

潘金陵見寄

臺城爲客久。書札竟寥寥。山水舟車近。風霜歲月遙。窮猿猶擇木。威鳳合沖霄。曾有論文約。應須折簡招。

再和卞仲祥

待月東扉外。一枝明燭殘。誰將丹桂子。種在碧雲端。病葉依牕濕。飢鴻集渚寒。嬋娟爲雨妬。悵恨又更闌。

次西和韻

貧是儒家事。生平畏四知。燈花空送喜。瓶粟不供炊。湖海心終在。田園計未遲。願同華山叟。驢背倒能騎。

八月十四夜月下聞秋聲

中秋纔一宿。此夜已圓明。星斗何曾見。雲煙不敢生。黃花千萬粟。白髮兩三莖。愁聽東南角。奔騰風雨聲。

樹葉

不知何樹葉。紅潤極鮮明。一片風吹落。幾番霜染成。止啼誠誑語。題字亦閒情。把玩真堪惜。攜歸予繡枰。

月下憶暢慶玉如四上人

臘中晴色久。霜月冷森森。可但思玄度。惟應憶道林。三更難得曉。一片欲歸心。有約分苔石。南山蒼樹陰。

曉霜

重衾驚驟冷。萬瓦見濃霜。夾岸兼葭白。空庭橘柚黃。宦情真淡泊。歲晚轉荒涼。野寺鐘聲早。何人僕馬忙。

中元詩

初秋當望夜。平楚帶斜曛。暑氣能昏月。砧聲不隔雲。華燈浮白水。老衲誦冥文。土人放燈漫說中元節。儒書惜未聞。

和子野四首

旅食無生計。卑棲奈若何。飯惟供脫粟。衣未補香莎。戶外屢常滿。床頭金不多。老爲文學掾。一似舊恩科。

宋特奏名授縣文學。○案恩科。原本作恩科。改宋有特奏名科。以恩賜第。多注教授等官。思字乃恩字之訛。今改正。

窮冬霜霰集。行路古今難。舉眼看浮世。何人耐歲寒。棄瓢將止酒。脫冕擬休官。一室能容膝。吾生亦易安。
亨塗卽畏塗。暮境欲何如。索米多貧士。抄詩欠小胥。自緣鄉夢熱。頓與世情疎。會約逃名者。山間倒跨驢。
詭遇非吾事。支離笑我身。文章寧可拙。仕宦豈宜貧。鄉故多新鬼。年荒少佚民。休嗟華黍廢。陽谷易回春。

再疊

醉眠春一榻。不記夢伊何。落月明紅葉。寒廳暗綠莎。敝袍爲客久。高枕閱人多。未有匡時策。無心中甲科。
世態年年改。窮居事事難。予懷雖浩蕩。此地本酸寒。古瀨浮貞女。空齋貯冷官。枯腸與藜藿。歲久頗相安。
老景存三樂。浮生付六如。是非忘馬指。憎愛任烏胥。烏胥見說苑故里仍饑饉。清流例闊疎。有人風雪外。詩在斷橋驢。

雪溪漁隱者。郊島是前身。乍見猶疑傲。相逢不說貧。鶴招窮處士。梅伴老詩人。時共論文酒。衰顏少借春。

三疊

禁酷限十日。亡何能幾何。流光徒荏苒。老眼自按莎。江浙歸心切。山林醒眼多。富家憂歎率。役後欲重科。
爲貧干寸祿。匏繫欲歸難。鴈字誰能寄。鷗盟久已寒。自憐秦博士。何以衛伶官。終覺家居樂。高眠一枕安。
在昔金淵地。煙花錦不如。衣冠尊史祖。漢史山水識靈胥。富歲人多賴。前修日以疎。洪厓仙可問。願乞雪精鹽。

飽喫芹宮飯。飢寒未迫身。公侯方重老。妻子莫憂貧。蹤跡新豐客。心期畫邑人。皇華歌一曲。聊以和陽春。

案莊子天地篇。有折楊皇華。古歌曲也。原本作皇華。今改正。

黃渚舟中

夕晴殊可喜。小作川原遊。水岸菰蔣合。野田鴻鴈留。雲煙易得晚。城市那知秋。落葉塞破屋。逃亡令我愁。酌彼溪店酒。醉向舟中眠。舟人待月出。急急乘曉牽。前山見瓦屋。山名小約橫沙田。橋名回首六百載。我思唐謫仙。

棕莊

幽徑秋陰合。青渠草色深。肯教木葉落。直見夕陽沈。獨客逢來鴈。新寒集遠砧。芙蓉花似錦。有意媚高林。寄鄂渚王子文教授

笑把青藜杖。遠遊黃鶴城。雨消戰伐氣。春生絃誦聲。相從未有約。久別難爲情。東望思渺渺。江長秋月明。送楊剛中巽申赴淮安教授

西蜀楊君子。才爲博士優。儒官清似水。學舍小于舟。吳地仍多潦。淮田薄有收。雖非溫飽計。足解友朋憂。風起

朔風連夕起。浩蕩厲嚴寒。遠勢驚春夢。微權屬冷官。雲行和月暗。木落打牕乾。因憶吳船客。波濤寢不安。廣教寺

三門當驛道。四壁啓僧房。頗有千竿竹。能令六月涼。撞鐘山鶴起。煮茗石罌香。岸曲盤渦急。人言古瀨陽。

次彥功韻

春早風驅雪。天寒竹映門。燈前終夜讀。笈內故書存。尙覺文章貴。那矜齒爵尊。向平愁未了。女嫁與兒婚。

雨止

半夜雨忽止。老夫心頓寬。最憐兒女弱。難受雪霜寒。澤國無來棹。臺城有去鞦。西村歸未卜。此日敢求安。

薄遊

未草閒居賦。聊從薄宦遊。江湖明老眼。風雨暗孤舟。客況何曾好。吾生本自浮。終然愧農圃。將有事西疇。

形

形影自相問。追隨六十年。冷官真漫爾。歸夢亦遽然。但覺寒風暖。難令素髮玄。可能學陶令。家去有園田。

曉出西城

閒官閒不盡。曉出古城陰。斗柄已插地。秋聲將滿林。故園三畝宅。落月幾家砧。爲報柴桑令。予今亦委心。

三更汎舟謝達淪

淪水不盈尺。大舟行水中。朦朧微有月。澹灑寂無風。時序三秋半。陰晴萬里同。山歌與村笛。醉臥聽漁童。

代步

羸驂聊代步。按轡且除行。凹凸驚前路。驅馳羨後生。曉回天尙闇。路滑雨初晴。得似肩輿穩。歸來醉不驚。

舍北野步

野步上西門。寬平又一村。疎籬圍古井。密樹擁高墳。家有田園樂。氓知守令尊。因思興廢事。變滅似秋雲。

次蕭饒州韻

愛山如愛士。交友竟忘年。未老先辭祿。能開始是仙。清談真樂石。雅志樂林泉。笑看衡門外。隨風柳絮顛。
謙謙賢太守。止止樂閒居。健筆凌三謝。高風繼二疏。家猶傳故笏。夢不到安車。何處溪山好。相從結草廬。

再用韻

寓舍已三遷。閒官又一年。酒杯時樂聖。茶碗欲通仙。愛筭從穿壁。澆花自汲泉。誰能問前代。劉馭與秦顛。
數椽西郭外。元不異村居。官冷謀升斗。頭重怯比疎。莫愁書費紙。肯嘆出無車。也勝焦徵士。蝸牛臥雪廬。

同室

同室過百指。一官淩四年。幸無乞米帖。何取買山錢。止酒陶元亮。思歸孟浩然。乾魚兼菜把。頗勝酌貪泉。

朋酒

朋酒朝朝樂。鄉心夜夜愁。朱雲難作吏。案東原本作史。攷漢書朱雲傳。薛宣爲丞相。雲往見之。宣謂雲且留我東閣。雲曰。小生乃欲相吏耶。史字乃吏字之訛。今改正。宋玉
曷悲秋。陵谷何曾改。田園未可求。南來幾鴻鴈。亦爲稻梁謀。

之金陵

文學本閒官。案文學原本作士學。攷仇遠爲深陽學官。詩中當用文學兼故事。士字乃文字之訛。今改正。長年愧素餐。出門還自笑。行路有何難。風日幽懷

暢江山望眼寬。六朝遺迹在。隨喜一遊歡。

方萬里、史敬輿、陳孝先、龔聖予、胡穆仲相繼淪沒。令人感愴。

諸老俱塵土。令予雙淚流。幾年能再見。一氣故應休。江左衣冠盡。人間翰墨留。空山茅屋底。野史屬誰修。

寄陳南翔張伯成主賓

山水未遊徧。其如歸夢何。獨憐黃渚月。相隔白瀟波。秋盡那無鴈。霜遲尙有荷。終期共燈火。插架異書多。

遣意

袞袞歲年晚。冥冥車馬塵。餓鳥方畏雪。凍草已矜春。鄉老知誰健。儒官自古貧。明朝除夜近。市井悄無人。抖擻老精神。飄蓬又一春。敢言惟有我。每恨不如人。文字須稱韻。功名莫認真。青銅杖頭在。留與買烏薪。宦遊今倦矣。歲晚意何如。臘雪不到地。春風先滿閭。鄰翁寒乞炭。溪女晚供魚。多有梅花處。吾將卜隱居。

利交

一自儀秦去。縱衡直到今。士緣貧失節。交以利知心。乍可昏求火。何堪晝見金。狂瀾回亦倒。猶幸有山林。

聞雞

今夕知何夕。此聲非惡聲。牕前疑月色。枕上誤天明。未必皆三唱。惟應只四更。姑蘇城外寺。此際已鐘鳴。

題水軒

水軒寒最早。偏稱冷官居。老態重衾薄。秋聲四壁虛。霜前蛩漸少。雨後葉全疎。漁叟頑如鐵。鶉衣曉捕魚。

有感

腐儒乖世用。作事例迂疎。浪走長安道。欲投光範書。懸知成漫爾。可笑賦歸與。寄語陳言者。毋輕出草廬。

潦雨排悶二首

淫雨喧中夜。羈人積隱憂。葵傾那有日。麥腐欲無秋。小市運如洗。前溪漫不流。林鳩兼埯鶴。聒聒幾時休。宿雨漲溪流。江南四月秋。市無糧得糶。田有麥難收。官況全然冷。民饑絕可憂。沙鷗應笑我。何日放歸舟。

跨馬

跨馬入城去。驅雞上屋飛。閒官差可樂。徒步未爲非。杜老平明出。山公倒載歸。晚汀沙水闊。野鷺得相依。

醉歌三首

金淵醱酒賤。足可醉亡何。日覺醒時少。其如飲不多。人生閒調笑。俗事暗消磨。此意神仙會。山童亦解歌。客居真易過。凡事不如儀。惟有閒尋睡。渾無趣作詩。晚晴行數步。日午酌三卮。繫馬庭堦下。人多借去騎。清狂歌窈窕。微醉困膏肓。酒薄多疑水。官閒一似僧。已知燈卽火。不願谷爲陵。百事俱能了。惟餘飲未能。

自愛

金淵豈愛我。我自愛金淵。似蜜醪尤美。如珠米更圓。攜家隸八口。竊祿又三年。書冊盈歸篋。毋嫌載月船。

和友人韻

山林空入夢。詩酒未忘懷。老興自不淺。卿言亦大佳。封侯無骨相。學道有心齋。安樂行窩在。棲棲且避乖。

呈王達之御史

西晉文章伯。南臺法令師。常因行部日。記得從遊時。敏手除三害。貞心畏四知。何由侍王導。揮麈話襟期。

贈別葉子啓郭祥卿

萍水偶相逢。金淵客路中。帆船明日發。尊酒幾時同。窮達無先後。交游貴始終。湖堤梅柳外。有約艤疎篷。

敝車

汝自騎高馬。予寧坐敝車。功名輸俊茂。天地著迂疎。漫說癡人夢。仍看後世書。竊仙酒樓在。不醉欲何如。

張氏隱居

杜老曾題品。依稀舊隱居。頗知書有味。肯教子爲儒。築屋先通燕。開池剩養魚。相邀須飲醉。酒熟不煩沽。

過鄭氏幽居

趁雨過雲關。東風尙峭寒。野花渾未放。石路卒難乾。薄酒無多酌。窮途信少歡。歸來借蓑笠。莫作老坡看。

懷方嚴州

案嚴原本作嚴。攷詩中虛谷乃方回號。回嘗爲建德路總管。故稱方嚴州今改正。

八十一年前。科名已爛然。依劉王粲檄。入洛賀循船。受禪碑誰上。閒情賦自傳。江山英氣歇。堪恨亦堪憐。

八十一年終。堪嗟旅櫬窮。胸中元耿耿。身外竟空空。白首太玄草。紫陽虛谷翁。平生有遺恨。五馬未乘驄。

八十一年亡。哀哉老紫陽。佳兒方戒道。小妾漫專房。每憶先生被。常懷太守章。桐江詩萬首。端可及龜堂。

八十一年身。棲遲客館貧。登門曾有我。銘墓竟何人。醉夢高樓月。悲歌故國春。可堪西望處。

八十一年休。云何不首丘。豈無商女恨。肯作賈胡留。書籍從人賣。田園有子收。烏聊山在望。風雪去悠悠。

懷張似之
釣鼈亭

少日登山屐。中年上水船。黃花猶自綠。白髮若爲玄。但覺杯行速。那知帽影偏。南峯深秀處。回首重潸然。

除夜新居

俯瞰秦淮水。前瞻魯泮宮。明知倚闌者。不是釣魚翁。古石稜稜長。春潮脈脈通。狀元真宰相。千古一吳公。

避喧遷出郭。歲晚尙擔簦。陋室大于斗。長途滑似冰。豈無問字酒。共守讀書燈。老病須微祿。歸田恨未能。

糝盆夾道明。爆竹小兒驚。但聽牕前雪。不知樓上更。流年雙羽急。深夜一鷄鳴。淺醉和衣睡。明朝要賀正。

茅簷盈尺雪。真是冷官居。窮巷稀人跡。今朝是歲除。聒廳無鼓吹。消夜足琴書。曉凍冰橋滑。鄰家借板輿。

金淵集卷四

七言律詩

元夕放夜

繡衣玉節駐江城。放得元宵兩夜晴。陸地金蓮方盡盡。一天明月故盈盈。選兵酣臥忘鐘韻。遊子歡呼趁鼓聲。兒女看燈歸較晚。老夫自剔讀書檠。

憶西坡梅

杖藜久不到西坡。苔上梅花積漸多。野屋荒涼誰管領。酒尊期會竟蹉跎。韶光二月已強半。樂事一生能幾何。賴有鄰園春可折。洗瓶斜插在行窩。

三月二十六日書所聞

從來賽社說金淵。鼓笛鉦旗隘市廛。地上鬼神行白晝。夜中風雨洗青天。妖氛旱魃驅無跡。和氣歡聲兆有年。車馬縱觀兒女事。老夫閉戶讀章編。

寄陳仲麟

景仁

構李城邊送客船。梅花一別又三年。清風朗月思元度。駿馬名姬羨謫仙。湖海倦遊予白髮。園林真樂子青氈。楚生卜宅平生志。歸日相從學力田。

予自存博解印歸鄉心日夜相趣。古人有名山川處輒忘歸。然歸未易忘也。夢得一聯續之。

寒風宦海足波瀾。常憶西湖南北山。熟處肯忘生處樂。別時難易見時難。得此二句。奉親還舍君先得。投檄

歸田我未閒。漫說桃源人迹絕。故園松菊半荒殘。案此詩則考二韻通用。雖本蘇詩。究爲出韻。不可從。

送張叔夏遊金陵

肯向金淵暫泊舟。相逢袞袞別方休。移宮換羽周郎顧。詠月吟風太白遊。吟風詠月出太白集。范傳正作。牀上無金猶好客。尊中有酒可消愁。明朝又作臺城客。細看青山似洛州。

送陳壯甫稅使歸金陵

征商廉軒不言錢。異事同寮又一年。美譽正香金淵曲。歸心已在冶城邊。家傳簪笏青溪譜。風送旌旗上水船。小草相依行有日。莫須慘別重凄然。

蕭饒州見寄次韻

夜來聽雨夢仇溪。夢覺招邀客賦詩。我自不分官冷熱。子須能別酒瀟漓。江頭風順鱸魚到。天外春歸杜宇知。十日菊花元不減。恰如六月見蒲葵。

喜晴

新歲連朝喜遇晴。宜人宜穀最關情。郊原尙覺春光薄。市井先傳米價平。趁暖飛蟲生滅易。向陽征鴈去留輕。北門冷掾無公事。閒看官梅野柳爭。

題趙千里溪山春遊圖

一溪流水數家村。短樑長松映幕門。不是花通輞川口。祇疑路隔武陵源。小橋瘦馬行春色。遠浦青山帶雨痕。樓觀玲瓏雲縹緲。須知畫裏別乾坤。

寄武康王居正

曾向清溪采白蘋。江東日暮別經春。投金瀨上思歸客。浮玉山前憶故人。千里雲萍應念我。一庭風樹敢忘親。挂蓑石屨苔衣厚。擬買漁舸作近鄰。

寄梁中砥

句曲峯巒翠倚天。琳宮瓊館宴神仙。水程纔隔一百里。腳債未償三十年。幾擬看山攜酒去。相期聽雨對牀眠。何當撥遣塵間事。一試松根喜客泉。

寄子野

西牕隱几讀南華。頗悟亡羊與戰螭。住久不知身是客。歸休誰謂女無家。向陽野竹先抽筍。待雪官梅欲試花。我愛睡鄉真樂地。底須頻喫玉川茶。

黑兔

何年偷舐玄霜鼎。變卻蟾宮玉雪姿。毛穎未封先試墨。褐衣乍著便披緇。移來鳴谷鳥相對。躍入陰山鬼不知。蹤跡分明予甚愛。正當秋曉月明時。

和劉君佐韻寄董靜傳高士

雪暗江湖入暮年。何人葦外小延緣。水痕不動玉平岸。春意欲回花滿天。懶出恐消桐屐蠟。醉吟忘上學袍船。行當歸學林和靖。接屋梅根伴鶴眠。

驚蟄日雷

坤宮半夜一聲雷。蟄戶花房曉已開。野闊風高吹燭滅。電明雨急打廳來。頓然草木精神別。自是寒暄氣候催。惟有石龜并木鴈。守株不動任春回。

鴈去

離羣野鴈在中庭。馴養經年羽翼成。因爲哀鳴殊可念。豈知飛去太無情。天陰月黑多機穽。歲晚山空少弟兄。願爾水田常飽煖。春風早問北歸程。

寄屠存博

三年塵土白鬚眉。擬向西湖濯客衣。林下杜鵑猶勸去。海邊鷗鳥亦知幾。及瓜將得葵丘代。存菊須尋栗里歸。見說中山屠博士。鄉心也趁白雲飛。

再寄子野

霜力風威各逞強。老夫絮被不離牀。一貧已幸官將滿。百計無如歸最長。別後交朋難得信。夢中文字不成章。從來心似梅花白。莫入東風桃李場。

寄鄧善之

幾年不寄子公書。忽向燕南遺鯉魚。天遠地遙歸未得。男婚女嫁事何如。壯遊自致青雲上。漫仕誰憐白髮餘。案漫仕係米芾自號。無作設字者。原本訛作設。今改正。西浙林泉俱可隱。毋忘舊約共閒居。

醉聞杜宇

幾日冥迷醉夢中。醒來衣袖裹春風。杜鵑未歇鳥聲碎。芍藥已開花信空。差勝跨驢愁杜老。儘教騎馬笑山公。卑官安得金貂換。尙有杖頭三百銅。

北村吳園雨中賞牡丹主人留飲

不謂村閒見此花。嬌紅數朶眩晴霞。可憐國色天香種。竟落田夫野老家。略具杯盤供筍蕨。已拚杖屨污泥沙。莫愁乳鹿銜春去。自有蓬蒿盡力遮。

官冷

不負平生下澤車。宦游卜宅亦村墟。家貧累重須干祿。官冷身閒可讀書。高柳每聞鶯姪姪。破籬時度竹蕭疎。西南林壑堪娛晚。靜看飛雲自卷舒。

喜晴復雨

早起方誇甲子晴。夜分忽又似盆傾。黑雲冉冉連燈暗。白浪滔滔與岸平。芹未出泥先有燕。花都委地尙無鶯。東橋沙鷺多舟楫。直下荆溪不待撐。

五日

湘魄能傳楚澤芳。何如倒載醉襄陽。夕陰空照栽葵圃。宿雨難乾打麥場。龍去涎留丹井濕。燕歸泥落墨池香。枉將黍粽沈蛟窟。移與江村餉水荒。

雨

方放庚申一日晴。天明一日雨如傾。烏雲覆地陰陰合。白浪侵田濶濶平。屋漏未乾連礎潤。橋低欲壓礙舟行。桔槔不是閒家具。會聽溪邊鵝鷓鳴。

雨坐

梅霖寒似麥秋天。風葛淒淒未脫綿。金彈落池盧橘熟。紅巾委地石榴鮮。汨羅遺恨空千載。瀟水閒居尙一年。蒲酒相邀須徑醉。歸尋枕席付高眠。兩年蒲節雨霏微。誤我中山采藥期。騎馬出門隨所寓。看花酌酒復奚疑。量慳未易勝金瓊。臂弱猶堪繫綵絲。追憶侯家陪宴賜。素紈紅葛翠交枝。

與子野過永仙觀。循西城以歸。邂逅李戒甫。夕山西爽。詩料滿目。子野明發詩來。予次韻。

壤垣荒逕入蒿萊。不惹康衢半點埃。賞靜偏憐籬筍長。趁涼自引瘦筇來。盃餘漱齒呼新茗。石上題詩剝古苔。試問依簷雙老檜。何如列柏在烏臺。

一笑相逢李伯時。樹陰匝地綠雲低。林梢落日猶餘丈。天下好山多在西。我醉欲歸須客送。君裝已趣向

鵲啼。明朝定有新詩句。且讓溪翁向上題。

寓舍在青安門外。由是出郊不數里。羣山獻狀如游龍。如奔馬。如踞虎豹。深秀坡陀。不一而足。似有招引賦詩之意。遂約子野再用韻。

西望寬平倦眼開。風收雲翳掃煙埃。誰能白日捲簾坐。盡看青山排闥來。合沓斷岡如引蔓。盤陀大石不生苔。此中林壑多仙跡。何必吹簫更楚臺。
山列瑤簪束不齊。過雲舒卷樹高低。孟郊李白曾行處。秦華瑯琊盡向西。瘦馬自穿幽徑去。老鶯猶戀落花啼。豈無匡壁平如削。留與詩人醉墨題。

和仲祥大風詔

正憂蘊蘊與隆隆。怪得連朝起大風。酷日從今宜斂暑。大王自古解稱雄。中庭老樹吹將折。破屋重茅捲已空。可是南溟鷗欲化。爰居先避魯門東。
非雨非雷勢可乘。柔枝弱葉力難勝。疾於健將追奔馬。豪似吟仙賦大鵬。柱砥潛移黃蠹穴。山屏盡啓白雲騰。直須少霽飛廉怒。水落圩田穀再登。

巫雲九峯

誰割巫山一片雲。峯巒羅列比兒孫。嵌空自是天生穴。剝蝕無非水渲痕。霜削秋清連竹色。露映曉翠及蒲根。九峯九鎖參差似。永鎮仇溪第一村。

觀雨

雨師殿後疾雷先。風捲浮雲似擘綿。大點成漚添黑潦。濃陰匝地暗青天。峰中暴長瀾漫水。圩上平沈沮洳田。米直頓增車戽急。早推紅日麗金淵。

宦海

黃帽棕鞋隱者便。青衫槐笏我家傳。一生碌碌空多事。六袞駸駸欠二年。安樂窩中閒有味。溫柔鄉裏老無緣。浮沈宦海終非願。早葺山南屋數椽。

屠存博教授赴溧水任留飲寓舍

只隔山中一日程。書船暫泊溧陽城。儒冠喜見賢翁季。道眼相看老弟兄。酒量吞江涼更闊。蟬聲送客晚爭鳴。青衫肯爲琵琶濕。笑向天涯看月明。

寄戚子雲

七不能堪一不成。閒雲自恨出山輕。柳枝駱馬愛心斷。案白居易詩。有駱駝放楊枝語。詩家沿用。無作柳枝者。此似失檢而誤。尊菜鱸魚歸興生。薄宦棲棲留泮水。故人渺渺隔臺城。對牀風雨何時卜。共翦青燈話到明。

送張巨川歸崇德

三載金淵入幕賓。轉當繁劇轉精神。高堂多有承顏樂。巨室都無切齒人。此日吏民爭臥轍。他時事業繼埋輪。語兒溪上滄浪水。有約征衣共浣塵。

二十五日東風少定。辛丑夜。西風再作。

東風已掃九衢埃。何事颺輪去復回。秋信蘋洲涼漸迫。人家蓬戶晝難開。低田受水祥禾偃。亂石飛空巨木摧。見說長淮旱無雨。蜚蝗幾欲渡江來。

五月六日晴。芮君節。卞西仲諸友來泛蒲。和韻。

端午淒涼雨壓城。忽然端六報新晴。素衣塵暗行人老。綠樹陰濃曙日明。倦眼冥冥渾似霧。憂心悄悄只如醒。枇杷薦酒猶堪醉。杏子微酸尙帶生。

用韻答蕭濟翁

想君不欠買山錢。要學騎驢孟浩然。拂袖徑行輕萬里。著書直待後千年。林泉短褐淒將老。齋館孤燈耿不眠。明旦履霜何所向。大茅峯頂看芝田。

答徐恕宣城寄別

懷古濟然老淚流。依稀見月喘吳牛。客鄉時序留如燕。學舍風波小似舟。已恨浮雲無巧夕。未知後月可中秋。徐卿忽寄新詩札。正倚雙溪疊嶂樓。

江陰何仲禮相訪和答

月照空梁幾夢中。翩然環佩下天風。十年不到澄江上。一櫂能來瀨水東。湖海交遊今漸少。英豪見識略相同。舊時東野吟詩處。何日攜壺酌此翁。

答趙源仲

人到中年萬事慵。我今况是六旬翁。歸心已薄西湖水。餘力重修古泮宮。官裏簡書尤可畏。案頭筆硯豈無功。邇來士習殊輕陷。願與醅儒振義風。

交山龍祠禱雨

曉入荒陔步斷岡。多年廟食白龍王。要添溪上半篙水。不遠山中一瓣香。灌木雲昏旌旆出。高田土渴桔槔忙。莫疑栖隱無深洞。且得隨車雨送涼。

題王師尹宜晚樓詩

高捲書簾雨氣寒。螺屏擁髻赴滄灣。去天一握屋上屋。斜日幾重山外山。地展畫圖增暮景。風吹笑語落人間。棲鴉已寂歸雲急。卻怪雲猶未得閒。

慶孝僧自金陵回虎林

白下長干住幾年。西風入夢即飄然。斷橋梅柳全非舊。古剎鐘魚大勝前。萬里豈宜常作客。一簞且可穩栖禪。案：簞字與送僧無涉。疑用僧家掛單之語。當作一單。滄江東去風波惡。亦欲湖山結數椽。

如上人歸問浙中友信

何年駐錫下山中。既見匆匆又欲東。燕去鴻來俱是客。雲生月落不離空。冷泉亭上參吟暢。謂文飛雪巖前哭老同。謂野方外友朋詢近況。爲言已作木雞翁。

過介卿溪南隱居

卜宅溪南遠市喧。一經教子守田園。邵平未老瓜先熟。靖節能閒菊自存。無白丁來多釀酒。放青山入別開門。朝衣曾侍天香滿。得似荷衣帶露痕。

悟上人同過史氏隱居

經時少暇出郊游。野曠山遙易見秋。祇怪朝來多爽氣。似緣我輩是清流。荒臺古井平蕪濕。斜日西風亂葉愁。莫笑田翁無款待。綠菱新摘酒新籌。

懷盛元仁

年過耳順欲何如。臂膝酸寒齒髮疎。千重驅馳還倦矣。數椽卜築合歸與。山銜落日誰能繫。海漲平田自可鋤。寄語虎林諸道伴。江湖處處有鱸魚。

秋日懷吾子行

秋高天闊鴈南翔。游子愀然思故鄉。重陽正當風雨近。三徑故應松菊荒。酒酣耳熱狂無益。江空目短愁何長。青山在望有晴日。我欲振衣千仞岡。

七夕

河鼓天孫各老成。無愁可解任秋聲。癡兒笑月羞眉曲。稚女穿針鬪眼明。夜半且分瓜果供。天中豈識別離情。未能免俗消光景。醉臥西風夢亦清。

歲歲今宵乞巧樓。疎星如奕月如鉤。莫將寒信侵房屋。肯把閒情問女牛。兒笑無書空曬腹。婦言有酒可澆愁。鵲慵竟失河橋約。盡日喳喳古樹頭。

題羣仙圖

世代雖殊道不殊。衣冠氣貌例仙儒。自憐無計攀靈轡。豈意相從入畫圖。把袂拍肩歸福地。抗塵走俗笑泥塗。苔痕還繞榴皮相。風雨東林壁半蕪。案蘇軾詩序：回先生過湖州東林沈氏飲醉。以石榴皮書其家東老蒼之壁。此詩二句。蓋用其事。相字或係柱字之訛。

永僊觀賞桂。劉君佐。黃景巖治酒。

雙桂嶢嶢萬竹間。雲枝露粟綴高寒。軒牕日日吹香過。冠蓋時時載酒看。月裏曾舂金柞臼。雨餘亂點石碁盤。乘槎仙子清如鶴。一曲霓裳舞素鸞。

中秋月出復雨。有懷葉子文。湯明叔。

溟濱三度見中秋。感歎光陰逐水流。常是浮雲妬佳月。不容老子醉高樓。鱸香易動張翰興。鯨背難追李白遊。遙憶詩人豪氣在。湖天空闊放扁舟。

中秋待月不見

期修翫事在杭州。月夕那知常滯留。縱有侯芭嘗載酒。惜無李白共登樓。蛩催織婦貧非懶。雲掩霜娥老似羞。應笑山翁癡守待。滿身風露冷貂裘。

年年待月引壺觴。坐對中庭玉一方。靜夜忽驚雲作雨。索居空使客思鄉。荒雞聲續簷花滴。蝴蝶夢回巖

桂香何處高樓見。山閣快予吹笛據胡牀。

賞桂

秋來常爲桂花忙。葉葉西風粟粟涼。奎甫宅中開四樹。儒珍園後燦孤芳。小山招隱人空老。朗月當庭影亦香。可必明年能賞得。一觴且醉此花旁。

夜聞秋聲

西南振響使人驚。未必秋聲作此聲。萬騎奔馳聲鼓動。千夫翻踏桔槔鳴。初疑潮汐還疑雨。只在山林不在城。人道今年豐稔兆。燈前起舞待天明。

金淵集卷五

七言律詩

送許君起赴餘干教授二首

君起生荆溪。僑寓錢塘。與予卯角交。再世契家也。予方倚席溧陽。君起將振鐸于越。同飲江東水。分千里明月。兄弟真情。槩見乎辭。

當年而父同吾父。各罄囊金共教兒。可惜兩翁黃壤下。不知二子綠衣時。著鞭雖已撞樓破。列鼎寧無負米思。千里送君何以贈。長歌泮水蓼莪詩。

蘭佩蓉裳似倦遊。東隅雖失尙堪收。君騎漱玉亭前馬。我鱣投金灑上舟。八品一官俱獨冷。兩州千里隔三秋。南溟鯤化君能事。甘分西湖侶白鷗。

聞金之一、鄧牧心、葉去文皆羽化山中。

獨居學道坐枯禪。鹿豕交遊七十年。能以幻軀當雨雪。終無虛腹坐神仙。平生文字知誰愛。老死山林絕可憐。他日錢塘耆舊傳。三高宜入畫圖傳。

吳成季尊師與其弟玄初會于維揚。卽還金陵。成季寄詩。因和。

初平兄弟總神仙。化石爲羊入上天。萬里相期雲上下。一江不隔水淵濛。對牀夜雨吟詩燭。歸櫂春風載

酒船。此是人生真樂事。岸花汀草意無邊。

寄吳玄初道錄

桃花兩度見青春。夢裏玄都隔幾塵。升斗自憐爲客久。舟車每惜寄書頻。君如當日陶弘景。我亦他時賀季真。東望冶城空戀戀。西湖非晚作歸人。

中秋月出復雨。有懷葉子文、湯明叔

三秋此夕恰平分。城市人家半閉門。正憶紫雲吹玉笛。忽驚皓月照金樽。宦情素薄鴻初到。詩興方濃雨又昏。不是桂花香自慰。倚欄無語易銷魂。

明朝

秋風嫋嫋雨瀟瀟。兀兀郊居出市遙。未欠三盃通道。且欣九日是明朝。籬邊舊菊猶堪摘。天末新鴻不可招。莫恨登高無腳力。強搗湘竹造山椒。

和西仲秋日聞鶯詩

不待風霜剪碧林。柳陰忽見一梭金。似傳西帝宸遊信。室惹東臆夢覺心。暫輟笙歌聊試聽。既無桃杏莫須吟。舊交燕子歸何處。好倩賓鴻爲嗣音。

中秋同陳奎甫放舟

尋芳訪桂意相尋。波雨山舟泛綠波。老眼已無秋苦北。雄心莫用夜如河。金樽漫酌忘憂事。玉露初涼感壯年。此夜良辰真可惜。明朝又是幾多秋。

素娥爭得西風捲雲幕。與君弄月扣舷歌。

次日歸舟和南仲

案此詩以山發端。與前後諸什似皆在深陽校官時作。

山山渺渺點青螺。古瀨澄澄似絳河。塵世不知秋過半。水鄉但覺月明多。輕舟傲兀魚龍窟。夾岸橫陳早晚禾。一笑躍身煙霧表。醉歸何恤夜行訶。

九月八日持螯

趁晴明日擬登高。十里龍山肯憚勞。但願有錢堪對菊。莫愁無手可持螯。茲官只合辭歸去。鼠腹安能賦老饕。行見白衣人送酒。已拚痛飲讀離騷。

九日諸友屏峯上方登高得登字

天借重陽一日晴。因過竹院遠尋僧。翠屏晚對無人共。畫棟朝飛與客登。旋摘菊花浮臘醞。待分貝葉讀秋燈。餘生有暇須行樂。漫向松岡歎廢陵。

九日次程公明韻

風帘獵獵傍簷斜。問酒來投野老家。佳節已逢重九日。東籬未見兩三花。科頭坐石從吹帽。拭眼看山似隔紗。七里岡前歸路闊。月懸破鏡憶秦嘉。

追和陳去非宣和甲辰重九韻

世態炎涼不足憂。吾生贏得日優游。九日忽驚楓葉落。百年幾見菊花秋。忘形詩酒新豐客。滿目溪山古

溧州聞道市橋騎馬滑。山公歸醉得無愁。

重陽見菊占冬晴上熟。

滿城風日釀輕霜。昨夜東籬菊盡黃。正月自非添一閏。此花安得及重陽。新鴻遠到愁無信。螃蟹中虛怕有芒。濁酒醒來聞吉語。晴過冬至兆豐穰。

南仲以潘老句約賦

秋聲浩蕩夜淒涼。卻喜田家熟稻糧。千里江湖隨薄宦。滿城風雨近重陽。菊花漸拆青青葉。桂樹猶飄粟粟香。幸是催租人未至。尊前聊爲足成章。

十日與侯伯用謝元齋諸友汎菊得頭字。

西風吹髮冷颼颼。賴有多情帽裏頭。九日已知成昨夜。綠樽聊復集清流。山房霜菊偏能耐。客路雲萍故自浮。欲識歲寒心皎潔。一方月色十分秋。

和胡定甫安

幾年野水倚扁舟。風雪塵埃暗綺裘。齊魯青山恆北望。江湖白鳥共東流。杜陵騎馬尋征路。李白題詩遍酒樓。文學卑官何足說。直須攬轡覓封侯。

澹泊相逢古溧州。世情客況雨悠悠。腐儒都不通人事。冷掾何曾似宦遊。輕薄成風雖可畏。廉勤律已每無愁。他時重會西湖上。把酒聯詩日自由。

和費廷玉

我昔南徐講席分。知君肥遯白雲村。草深能使芝蘭沒。木落方推竹柏尊。試問上書投魏闕。何如解組守衡門。西風吹醒槐安夢。斜日悠悠半隱垣。

笑人狗走鹿斯奔。父子瓜畦手自耘。不願青黃施斷木。且將蒼白看浮雲。山中聊友華陽鶴。野飯時羹古澗芹。顯宦何如廉賈好。茜卮千石鮓千斤。

史記貨殖傳。○案貨殖傳。有卮茜千石。鮓斤。及食買三之。廉賈五之文。故仇遠自註之。原本訛作食貨傳。今改正。

和南仲見寄

儒冠誤我欲投簪。抱膝聊爲隴上吟。故里未歸先入夢。新交雖好少知心。清光湛湛溪中月。遺跡沈沈瀨底金。聞道雪晴豐薺麥。行看放犢滿桃林。

我本西湖一散人。偶來溪上灑烏巾。波光綠映臺城柳。山色青回句曲春。客舍相親那忍別。交情到老願如新。江南天氣偏宜暖。滿目東風起麴塵。

送程子方歸蜀

薄葺田園溼澤邊。鄉心常夢蜀山川。梨花知幾逢寒食。麥飯誰能灑墓田。矍鑠老翁輕客路。扶藜稚子上江船。東還莫爲親朋戀。自古雲安有杜鵑。

風雪飄蕭季子裘。大江西泝過荊州。家溫無計歸葱肆。歲晚何人付麥舟。長子廊門寬後慮。輕帆入峽及春遊。明年好趁梅花發。共醉鱸僊舊酒樓。

又送程公禮侍父歸蜀用方萬里韻

遠從溧里上潼川。渚宿巖棲約半年。老子情懷原不淺。扁舟風景浩無邊。故鄉兵後幾人在。明月秋中何處圓。母氏懸懸兄弟望。順流及早理歸船。

和友人洮湖韻

落日洮湖自放舟。詩筒特爲寄交遊。征夫獨寐難爲夜。老我多愁不但秋。清興何人聯石鼎。虛名無夢到金甌。黃雞白酒田家樂。止有躬耕願未酬。

呈王元亨无僉事

三槐鬱鬱德之符。喜向金淵識大儒。早讀父書明體用。夙將使指厲廉隅。動搖山嶽威猶在。收斂風霜寂似無。人道魯公能辨獄。行看霖雨澤焦枯。時秋旱
祈雨

白海青

素禽敏疾出扶餘。六翮雙拳膽氣轟。海外天鵝能獨擊。雲間俊鶴敢齊驅。攬身直上非無見。戀主歸來不待呼。渭水鷹揚亦如此。好將粉墨寫成圖。

秋晚齋居

君子堂西屋數間。但能容膝敢求安。悄無人迹如深井。慣聽秋聲是冷官。繫馬堦前慵夜秣。種蔬牆下助朝餐。攜來書卷猶堪讀。好共青燈了歲寒。

校官既與廟官同。胡不移家在泮宮。暮四朝三嫌有累。歲糜月費愧無功。致身館閣須公等。曝背庭除任老翁。卻喜北牕新植竹。行看玉立向南風。

乾坤身世一蘧廬。南北東西總可居。此去三年韓博士。向來四壁馬相如。移文早遣僕徵米。敲枕夜聽兒讀書。駕駟乘驄非我事。不如醉兀小肩輿。

奇字生來識不多。莫煩載酒日相過。廓空儘有葉堪掃。門冷渾無雀可羅。肯爲功名虧道義。常因課講費吟哦。苔荒茅屋歸期遠。細雨簷花且醉歌。

和姜景屋

瓦霜輒日合寒晴。最愛幽牕遠市聲。懶去著書追管葛。閒來讀易玩周程。勞心未必能齊物。寡欲才堪論養生。蒼久不神何用卜。了知身世遯而亨。

開遍梅花臘漸殘。又傳新歷歲更端。書生愛日惟愁晚。稚子敲冰不怕寒。酒壓蟻筠醅可撥。詩題蠟紙墨難乾。宦遊得似家居樂。一枕三竿夢寐安。

和張輔之倚贈別

夜雨溪頭泊客船。簷花溝溜亦涓涓。燈前詩酒留三宿。紙上功名付百年。寒鴈叫霜投木末。晴雲扶日出山巔。夜歸苦被微官縛。不得相從酌冷泉。

方竹杖

勁節稜稜瘦且堅。形模界尺出天然。山翁甚愛資扶老。村衲無知誤削圓。偏稱深衣同此矩。漫誇長笛大如椽。有時閒爲吟詩出。徙倚中庭月一鉤。

授時歷以丁未爲一歲

仇山村叟始生辰。六表平頭又見春。檢歷今年交一歲。乘槎有日到三神。文章翰墨聊從好。富貴功名莫認真。且醉市橋新熟酒。紅梅花插白綸巾。一從妻子累心身。役役勞勞春復春。苦被長貧難擇祿。寧甘漸老不如人。廣文冷坐非無飯。張翰思歸豈爲尊。莫問當初弧矢事。祇今筆硯亦生塵。

秋懷和子野

霜紈如月勝吳紗。彷彿蟾宮路未賒。滌暑自宜斟瑞露。憑虛誰肯乞飛霞。荒城蔓草生螢火。古瀨西風起浪花。夢裏仇山歸未得。竹籬茅屋趁溪斜。自笑酸寒老孟郊。厭看俗事聚牛毛。故鄉甚愛鱸魚美。冷掾何嫌馬骨高。少日宦情原澹泊。涼風客鬢轉刁騷。荷衣槐笏徒拘束。不似芒鞋白紵袍。

陳明遠嘗塾與蔣平仲張伯成清話

霜晴泛渚狎輕鷗。人物欣逢古大丘。喬木故家猶昨日。寒花老圃正清秋。尊開北海心先醉。燭盡西廳話不休。笑我一身閒未得。又隨新雨上歸舟。

送郭君賢使君赴建德任

天邊久下紫泥書。日日東津望使車。最愛小兒騎竹馬。也隨迂吏過桐廬。良民吐氣心方快。宿弊盤根力爲鋤。祇恐聲名滿朝著。春坊賓客又新除。先朝日近侍明光。步武駸駸政事堂。玉宇承恩沾湛露。金淵遺愛托甘棠。江山此去分風月。門戶從來凜雪霜。虎兕梟狐宜斂迹。丈夫原不畏豪強。

和吳東升

知君豹隱白雲村。杖履春風忽過門。獨立幸無妻子累。老成喜有典型存。冰懸古樹花尤雋。雪漲寒江水不渾。冷落十年燈火讀。何時聽下約重溫。

和子野郊居見寄

知君標格眼前稀。暫別令人入夢思。缺有可彈何必歎。書如肯借本非癡。且看平子歸田賦。更和淵明述酒詩。我勸山中多種漆。收功莫恨十年遲。論心握手到忘形。性癖耽詩各瘦生。美酒三升差可戀。良田二頃不如耕。溪晴正熟眠鷗夢。門靜那驚吠犬聲。泉石煙霞能自樂。棄予高舉得無情。歸去來兮意趣長。幽居遠隔水雲鄉。花粘石几吟詩筆。風度溪房煮藥。把酒有時思太白。下車何日見元方。雲萍暫聚還分散。可是先生鐵石腸。

因子洮湖歸釣魚。西湖我亦念吾廬。途窮但覺知心少。性直由來料事疎。愛把琴彈招隱操。忍拈筆寫絕交書。人間喜怒須臾事。暮四朝三任衆狙。

生日和洪山甫嵩見贈韻

雪雲無罅霧無期。勾引春光入泮池。師道幸爲文學掾。堯夫喜見太平時。典衣沽酒從兒笑。閉戶吟詩只自知。甚欲相隨強歌舞。卻憐多病覺衰遲。

初冬郊行

喜聞穎弟與坡兄。趁小春晴野外行。獨樹荒村生處僻。落霞孤鷺去邊明。幽風酒食歸田樂。韶部堽麓打稻聲。從此廣文嗟飯足。素餐祇愧老農耕。懶向南園拜石兄。肯尋村叟傍溪行。黃雲覆畝金穰熟。白露橫江紅葉明。彭澤歸來辭內景。康衢擊壤曲中聲。一丁不識多牛者。應笑書田事筆耕。

公退曝日

公退無營懶讀書。出門佳客費招呼。閒搔短髮身將老。獨坐長簷日未晡。溪女賣魚隨市價。村夫騎馬納官租。勞生役役知何益。卻笑今吾卽故吾。

雪晴

臘尾春頭半月期。寒欺人日雪消遲。纔升晴旭扶桑樹。便拂東風細柳枝。和氣滿城真可掬。豐年擊壤已

先知侏儒溫飽皇天賜。行續中和樂職詩。

至日用張伯舉韻

博士無氈臥冷齋。有朋喜自遠方來。臘前一信春先到。隴首數枝梅已開。少忍年荒須辟穀。尙遲酒禁且銜盃。山中茅屋不歸去。空想秋風暗綠苔。

至日懷羅國賓

官冷誰能送酒錢。江鄉節物倍蕭然。容顏一日老一日。人事一年經一年。野僕竹輿侵曉出。病妻布被抱愁眠。甘心歸隱青岳下。閒共殘農理廢田。羣陰剝盡一陽回。霜日烘晴宿霧開。閉戶讀書差自樂。載肴問字莫須來。榮枯易了觀芸草。冷暖相忘付酒盃。得似山居酬應少。晝長閒坐看寒梅。

潤州許使君寄餉新釀。以流金牋爲贊且供詩藁。

浮玉琢壺香似桂。流金方絮滑如苔。報投且致相思意。酬唱須尋應猝才。嘗在上都。唱和者不移刻。君喜旌幢開使府。我貪花竹作春臺。明年準擬游招隱。莫放遮山繡幕來。

冬日小齋卽事

蘆葦周遭舊楮糊。就中穴地砌磚爐。儒酸官冷渾相稱。草臥氈眠本不拘。牕外十分西日照。簾間半點北風無。一瓶雪水煎茶熟。清氣眞能壓武夫。

君子堂小集

樂歲欣逢節序新。公堂稱兕集嘉賓。衣冠尙想江東舊。芹藻初回泮水春。無事聊爲文字飲。相看總是老成人。且須飽喫圭田飯。朝市山林各致身。

歲晏遷居

借榻青安恰一年。年窮何事復謀遷。官閒空館文章印。水淺難移書畫船。稚子歡呼新入屋。老夫歎息早歸田。人生聚散如鳧雁。極目江湖萬里天。

子野雪後寄和邵寄廷玉

淵明白髮滿頭生。肯賦閒情未老成。自笑冷官租屋住。每因來使出郊迎。橫經空忝先生號。解印仍呼處士名。惟有溪干隱君子。知予的的願歸耕。

琴書筆硯伴閒身。斗室依然不覺貧。野犬自來能吠雪。土牛此去且迎春。一甕輾轉衾無絮。四壁淒涼飯有塵。昨夜東風先破凍。江梅冷眼笑何人。

平明跨馬晚方歸。偃仰行窩早見幾。餘子祇宜牀下臥。詩人頓覺眼中稀。堂堂白壁埋黃壤。冉冉緇塵染素衣。得酒便須開口笑。雪畦紫芋勝秋肥。

素琴掛壁已多時。政爾難逢鍾子期。腹有精神難學道。面無塵土始言詩。山童隔壁沽村醞。田叟登門送墓碑。小市饑氓半糴米。青州太守可能知。

至後

凭高欲驗曉雲黃。東際紅光見太陽。便覺池芹春瀾瀾。俄驚簷竹晝琅琅。君師百拜恩難報。文史三冬志未償。吾道千鈞懸一縷。頗同繡線日添長。陽和昨夜到梅邊。喜得春風一信傳。同舍團圓齊賀歲。異鄉飄泊又經年。夢中歸路忘舟楫。客裏生涯寄俸錢。紙帳布衾差穩睡。不愁獨冷坐無氈。霜華如雪著烏巾。染鬢粘鬚白未勻。人羨久生趨老境。日隨長至到新春。投金瀨上能容我。貢玉堂中自有人。溧酒清醕魚菜美。不妨頻日宴嘉賓。了知五十九年非。景薄崦嵫合見幾。夜半雖當泉脈動。臘前未見雪花飛。客程鴻鴈駸駸老。家養雞豚處處肥。千日及瓜今過半。未知何日定言歸。

歲窮早睡

驥尾流光不可追。山中小草合知非。臘餘四日春先到。官滿三年客早歸。暗雨隨風茅屋漏。荒城爭米燎盆稀。明朝又赴公筵賀。燈下醒眠懶解衣。

十一月十六日學宮對酒

客況冬晴足自寬。招邀春意入毫端。浮雲蔽日俄生暝。急雨隨風故作寒。詩酒相尋忘爾汝。古今難必是悲歡。茫茫山嶽蘧蘧夢。不了梅花冷眼看。

衰年

衰年六十喜平頭。微祿虛名老可羞。自笑一生同蠅蠖。了知萬事等蜉蝣。寒歎元亮須歸去。老病相如已倦遊。只憶西湖春漲綠。柳邊雪外艤蘭舟。

送湯希賢晦庵書院山長

文公闕里女星源。手澤遺書尙有傳。精舍三年常作主。修程千里若登仙。青衫槐笏存家譜。練帶花屏擁客船。故老或詢予出處。爲言索米向金淵。

與李孔言上舍談星命

辟雍人物已無多。奈此江湖落拓何。鶴表只宜歸井邑。鴈程不必度關河。詩書志氣存司馬。言語功名付祝鮓。炙輠談天非我事。雨燈聊和醉時歌。

游士

游士登門索裹糧。塵埃冉冉化衣裳。老夫也自飯不飽。童子聊沽酒共嘗。彼此身謀寧枉道。古人樂事是歸鄉。家徒四壁侯千戶。夢裏誰能較短長。

歲除志喜

郊居守歲若爲情。一歲中間百事經。建業長男方入拜。桐江小女又歸寧。蒙頭被煖先高臥。婪尾盃空且獨醒。席上梅花開勝雪。寒香儘足慰飄零。

除夕前一日雪

江城臘盡漸春來。三白呈祥不待催。和氣已知隨處滿。梅花正用此時開。寒香冷艷相吞吐。月斧風斤巧剪裁。布絮寢衣烘未透。爐邊酒熟且銜盃。

呈王直卿御史

金淵寶地閱金經。朝夕追隨聽馬行。激濁揚清真御史。郎溫聽厲老先生。衣冠文物今無幾。車笠交遊最有情。早願明時相司馬。他年洛社會耆英。

金淵集卷六

五言絕句

小齋四花

艾納護春香。橫枝偃霜月。絕憐玉妃面。化作鐵漢骨。

右梅

翠翹玉搔頭。湘妃赴蓬島。如何譜騷人。不收此香草。

右水仙

晶晶雪前黃。矯矯霜下傑。秋香寧可衰。相與全晚節。

右菊

別作一家春。故畹已禾黍。黃香從何來。誰爲東風主。

右蠟梅

題扇

溪山隔岸好。風雨過橋危。何似高樓上。停雲且賦詩。
明穆公
茂樹坐終日。水流心不競。誰識山中居。萬動歸一靜。
下平

泉急喧溪碓。山深怯瘦驢。翟湯如肯隱。來此卜幽居。翟益
紅紫委塵土。綠牕清晝長。安知兩三竹。風已作秋涼。章
欹枕聞春雨。閉門見綠陰。可人歌扇底。猶有惜春心。張鑑

題趙希賢所藏墨竹

一竿千百葉。鳳尾翠交加。曾向僊壇種。和風掃落花。
新梢霧如沐。斷節霜不枯。西牕夕陽下。此君何可無。
謝家庭下玉。化作青琅玕。風標曷不俗。誰謂骨相寒。
直節豸獻角。低枝鸞振羽。古色鎮蒼然。非煙亦非雨。

題畫竹

誰謂籊籊竿。乃不如勁草。八風動地來。直節未易倒。
淨洗碧娟娟。顏色如少年。牕前風收雨。階下笋行鞭。
直節老欲枯。初篔瘦而勁。祖孫知幾傳。不改君子性。
新笋籊半含。節下粉猶綠。指日南風來。吹作階庭玉。

五更

僕云月未落。或謂夜過半。曉眠我正濃。漫漫何時旦。

一鷄一鷄鳴。夢覺天未曉。誰較夜短長。我睡不可少。
山寺鐘未鳴。城樓角已奏。角聲正可聽。敲枕續殘漏。
月轉參旗橫。梅花夢方熟。羅浮山忽來。毋乃地脈縮。
杭城打六更。市樓已攢點。流年莫催人。老色將冉冉。
丑夜方向寅。被衾冷如鐵。江南貧者多。奈此霜加雪。
愁多怯長夜。況乃衆病歸。何待六十年。老矣當知非。
鴈鳴鶴亦鳴。不待雞戒旦。平生善利心。一鳴思過半。
宰相當此時。已入待漏院。我輩獨何人。擁被猶困倦。
爐藏火尙紅。雪映牕已白。夢遊無色界。不知身是客。

枕上

雞鳴夜過半。霜氣入孤衾。歲時將脫屣。鄰家方搗砧。
出門雞一鳴。僕馬踏曉凍。豈知牧牛兒。正作維魚夢。
一官振饑荒。一官覆水旱。州里多應酬。田家少愁嘆。

七言絕句

三學士圖

李紳能歌詩。穆宗召爲學士。與李德裕。元稹同在禁署。時稱三俊。情意相善。文宗時。召兵部尚書王起。禮部尚書許康佐爲侍講學士。中書舍人柳公權爲侍書學士。每有疑義。卽召入便殿顧問。謂之三學士。恩寵異等。今所畫不知何人。予將叩之。舜舉之徒。

三賢品坐一枰碁。日永官閒對紫薇。好袖玉堂揮翰手。不爭勝負是知幾。

自笑

謁客登門不敢噴。強顏應接暫時親。一官本自如冰冷。更有依冰借暖人。

正月辛酉大雪三首

繽紛萬片打牕來。蔦趁斜風舞卻回。可怪今春寒特甚。梅花一半未曾開。
酒樓柳絮白紛如。帶雨隨風密又疎。萬景天全羣動息。玉堂人老臥茅廬。
從來春雪有人嫌。六出雖工亦漫然。客舍無氈渾可事。爐無薪炭褐無繇。

閏正月十三日夜雪

東風散雪亂如麻。擲瓦敲牕細撒沙。只恐市中薪米貴。不愁江上落梅花。

花竹圖

梅癭竹潤楚蘭馨。相約凌波作四清。最愛此君秋一片。湘江煙水曉初晴。

倦繡圖

花殘院靜晝陰長。困思瞢騰下繡牀。肯信村中蓬鬢女。夜燈辛苦織機忙。

書齋壁

苔色排簷綠上階。說說衿佩集虛齋。耳根厭聽閒風雨。惟有讀書聲最佳。風收細雨斷梅天。晝永身閒但欲眠。木枕桃笙真有味。廣文不用歎無氈。

早赴東寺行香詩

衝風冒雨過南橋。馬上聞鐘覺寺遙。客髮頓驚秋信早。飛蓬落葉兩蕭蕭。

喜晴

一簾遲日忽開晴。側近園池得散行。儘勝草堂窮處士。有花有酒作清明。

東郊少步

高低遠近樹陰濃。杖屨閒行萬綠中。一片殘紅無覓處。卻疑身在碧紗籠。野風吹樹廟門開。神象凝塵壁擁苔。笑爾不能爲禍福。村人誰送紙錢來。

寒食兩三首

山色空濛寒食雨。楊花零亂溧陽樓。老人豈有傷春事。酒後情懷似感秋。監官州牧趣修園。里正喧呼急報饑。店舍無煙雞犬靜。山村桃李已空枝。梨花白白柳條青。閉閣焚香奈雨聲。聞道清明明日是。江南風土只宜晴。

讀陳去非九日詩

憶得甲辰重九日。宜和遺恨幾番秋。蔣陵依舊西風在。一度黃花一度愁。

秣陵

鑿山疏水出長江。王氣如何可厭禳。後五百年依舊在。空教晉帝笑秦皇。
龜脊羊腸九里汀。芫花燦燦麥青青。此生不踏江東道。將謂金陵卽秣陵。

清正庵

蘇秦梓幼女歸華處

秦女吹簫躡綵霞。孤瑩幽館掩梨花。龍盤金寫崇真字。猶是寧王賜嗣華。

猿圖

天竺寒泉夜月明。洞深曾聽兩三聲。秋風木葉圖中見。比似前回大瘦生。

王母圖

蟠桃結實許誰偷。笑作承華殿裏遊。紫輦不留青鳥去。小兒空識茂陵秋。

題史壽卿二畫

香草何時號水仙。翠翹羅襪步蹁躑。風標宜作梅花伴。不入離騷亦偶然。
少年曾讀在原詩。忽見飛鳴傍竹枝。憶著江南好兄弟。歲寒風雪欲何之。

題吳遠秋塘雙禽

昔年曾聽雪兒歌。此日池塘見敗荷。寄語鷓鴣春已去。白蘋紅蓼奈秋何。
題江貫道雨溪晚釣卷後

雨後滄波泯泯流。樵夫歸去有漁舟。江郎縮地能如此。何必雙溪疊嶂游。
占風

露立脩筠鶴表同。戲拈紙帶爲占風。誰言心動非旛動。我本無心似太空。

田上暮歸

兩鬢西風客帽斜。晚雲橫嶺月籠沙。桑疇屈曲人蹤絕。螢火飛來照稻花。

酒邊

儒官冷落似村居。薄艾葵榴色色無。卻有一尊春釀在。醉眠猶勝楚三閭。
端陽正是獨醒時。閒坐難忘一酒卮。有客似憐官況冷。山童日午送茱萸。
下園送

四皓圖

本爲當時國本安。白雲滿袖出商顏。山中終是通人跡。不似圍碁在棧間。

題趙信國墨梅後書宋廣平賦

廣平鐵石清便賦。信國水墨橫斜枝。總是平生和鼎手。更憑誰寫簡齋詩。
素衣喜不污緇塵。貞女江頭見似人。桃李門牆零落盡。江南猶有一枝春。

題李益師謙所藏和靖吟梅圖

瓶插梅花一兩枝。逋仙隱几自吟詩。北風釀作西湖雪。不顧山兒凍得癡。

寄周吉卿慶孫

采菊籬根藥尚青。開門稚子喜新晴。笑翁錯料人間事。風雨如何不滿城。四壁寒葢已可憐。一處風露轉凄然。杜陵便是歸來早。也有荒閒負郭田。日日言歸未得歸。翻令兒女笑寒饑。而今已覺歸非遠。爲報山猿野鶴知。

又

閒居徧愛十日菊。歸計何資三月糧。肉食不煩憂菜色。田家粳稻已炊香。懷土懷居小丈夫。首丘祇覺老心孤。須營浙右歸耕地。五福星明正照吳。老來足力覺全衰。一日山行兩日疲。歸去蹇驢須買得。山中出入不嫌遲。

東觀徐鍊師景昭松隱丹房

仙館幽深竹覆牆。風傳石鼎煮茶香。門前老樹高如蓋。乞與樵夫話晚涼。蘇仙行部溧州時。曾賦黃冠白鳥詩。八十鍊師猶健在。自鋤松下取苓芝。

晚晴

濃雲忽雨散秋聲。屋壁斜捎澗澗盈。一陣西南風截斷。月華且讓夕陽明。

寄張伯雨答問近況

愁霖日夜水平疇。菜爛秧沈麥未收。聞道上司官賑濟。饑民塞破溧陽州。
去夏曾吟喜雨詩。今年苦雨溧人饑。三錢可得米一斗。恨不身生貞觀時。
屋舍田疇委白波。滿船妻子渡淮多。淮東見說荒尤甚。進退無門可奈何。
家書歷歷說凶荒。斗糶瓶春隔宿糧。六十一年今再見。繁華不似古錢塘。

寄京口諸友

郡邑山川我舊遊。歸舟千里十年秋。相逢若問村翁信。貞女江頭狎白鷗。
思歸寄張仲遠、崔進之

浙浙秋風吹葛衣。新寒已到讀書幃。官情客況俱牢落。不爲鱸魚也合歸。
不爲鱸魚也合歸。山中雞黍正秋肥。東籬菊在家來好。莫學淵明較是非。
書齋

穀雨宜晴花亂開。一壺春色聚書齋。園林此後無車馬。竹杖芒鞋政白佳。
宿范諱卿_{子順}書房

蕙雪渭遲氣壓燈。偶然素被共姜肱。老來頓悟妻兒累。卻羨山中有髮僧。
雁

鴈聲多處水瀾茫。西滄東湖足稻粱。纔過蘆汀好棲宿。幾曾一一到瀟湘。
偶作寄李良甫

閒官長日無公事。靜室焚香讀好書。飲水飯蔬差可樂。妻兒休嘆食無魚。
山中有雲難寄身。庭下鳴蛙殊聒人。他時尋我江湖上。不是玄真卽季真。
偶見

詩人作事例迂疎。纔見佳山擬卜居。湖海歸來餘一鉢。買山生計竟何如。
詩囊劍術走風塵。要買桑麻二頃春。可笑田連阡陌者。元非識字讀書人。
贈珪上人

一塵不染俗難干。百事無能心自閒。我道老僧癡未絕。有時采菊見南山。
山寺雪行圖送遠上人歸

萬壑千林鎖暮寒。瘦驢踏雪入禪關。流澌滿澗泥橋滑。少待春晴卻出山。
題五牧蔣氏所藏閻次平小景

綠蕪紅葉照秋明。白鴈孤飛我獨行。誰識草堂窮杜老。江南江北正關情。

題湯松年畫卷

貌得人間真乘黃。曹將軍後有韋郎。奚官牽挽猶西望。似憶春風首宿長。

蠶團心粟玉鬆。茶蘼香色似同宗。因思弄藥攀條處。花刺勾人曉露濃。
漂水道中

步屨春風白馬橋。車溝泥滑路迢遙。眼前未識千紅紫。但見新黃上柳條。
五峯合沓擁東廬。泉落芳塘早不枯。空鑿秦淮三百里。六朝王氣幾曾無。
中秋客中

帆落西江下瀾河。溧陽酒賤醉亡何。月明正照山公影。自覺今年白髮多。
浪洋舟中

輕舟十里過溪莊。桑棗成陰柳著行。不見玉山嵇叔夜。西風低草見斜陽。
和岳國華

落魄居塵迥出塵。丹房芝朮自生春。瓊州太守名家子。不是尋常賣藥人。
廣文飯少飯生塵。老去衰顏酒借春。吟癖何曾醫不得。古來清瘦是詩人。
倚月

大江東去月分明。烏鵲南飛露氣清。如此嬋娟人不愛。倚樓獨立過三更。
月上

月到東牕夜正中。人間天上廣寒宮。蚊蟲血食三千國。盡被西風一掃空。

題煙竹圖

楚山晴雨未分明。淡鎖蒼筠曉更清。渾是一江秋色染。只疑無處著秋聲。

憶窠石章氏女子

湖樹江雲隔杳冥。千峰萬壑夢中青。懸知茅屋孤燈下。逐字教兒讀孝經。

題孟浩然圖

風吹吟帽不知寒。款段奚奴凍亦頑。縮項鱸魚無可釣。歸鞭遙指鹿門山。

立冬卽事二首

細雨生寒未有霜。庭前木葉半青黃。小春此去無多日。何處梅花一綻香。
淒風浩蕩散茶煙。小雨霏微濕座氈。肯信今年寒信早。老夫布褐未裝綿。

送客湖橋

赤葉岡頭送客行。峰回路轉石橋橫。小春天氣晴偏好。禾稼新收麥又耕。
別酒離歌送馬蹄。歸鞍斜日故遲遲。小兒拍手山翁醉。江左風流一晉時。

題畫

紛紛鷄鷺一冥鴻。全放全收旦暮同。各爲稻粱飛不起。偶然相聚小池中。
天上高飛地上行。終難萬里附鵬程。鷺鷥股肉無人割。老守菰蒲過一生。

野籬

豆花小白。槿花紅。野屋籬門處處同。無限春風桃李占。卻將顏色媚秋風。

二馬圖

平生自比九方臯。牝牡驪黃骨相高。寄語金臺求駿者。精神元不在皮毛。

紀事

好田平沒石田枯。秋暑如蒸雨竟無。六十年前曾記得。步行一直過西湖。
淳祐丁未亦學予始生。

馬斃三首

曉廐驚呼我馬瘡。塞翁一笑欲何如。西郊或有閒迎送。卻向東家借蹇驢。
苦無馳驟但加餐。馬性由來不耐閒。官滿馬亡歸去好。且騎白犢看青山。
我無筋力汝難騎。埋汝郊原有敵帷。二尺篋輿原自穩。不勞鞭策強驅馳。

鄰家曉雞

嚴城鼓角送鐘聲。頃刻三更四五更。卻是鄰家雞唱準。不差消息已天明。

憶桐廬二女

子女生來願有家。耕桑隨分各生涯。誰知我輩鍾情處。看過桃花看藕花。

冲眞庵詩

洞房深鎖老雙成。門徑幽脩石沼清。萬紫千紅秋已盡。眼中黃菊最分明。

落桂

養成花魄是輕陰。風露淒淒已滿林。到底難磨秋富貴。一庭香粟萬黃金。

冬夜和陳道士韻

焚香讀易樂閒居。參訂先天太極圖。人道三分程氏傳。較他漢上有差殊。聞道孤根暖已回。扶筇攜酒出山來。數花羞澀西坡上。也當春風一度開。石銚溪芽活火烹。旋燒敗葉帶枯藤。路遙難遞中瀟水。且試梅花澗底冰。三白先春慰客情。瑤林照耀夜牕明。淺斟低唱癡兒女。那得工夫問雪聲。

多雨

菜色青肥麥漸黃。雨多泥滑野畦荒。官田昨夜方車水。早起看來又渺茫。

自歎

休言五十九年非。本自無知底用疑。已往方來俱夢境。是非原不較毫釐。

言懷

辛苦移家向溧州。微官祇爲斗升謀。尋思終是西湖好。日與山僧野老遊。
奉溪半日到杭城。溪外青山喜送迎。結屋臨溪差易事。買山無計若爲情。武康
湖光門外草連空。萬壑千崖紫翠叢。縱未便能營隱墅。也須先畫作屏風。餘杭
白雲溪上野田平。黃隴山前竹樹清。已許數椽容小住。餘英愛我愛餘英。德清
故家喬木盡丘墟。笏石猶存十數株。誰有挾山超海力。爲分雲片過西湖。州南故趙忠靖丞相宅
此地曾經李白遊。湖山消得好詩留。兩橋十里東西市。只欠春風一酒樓。
溧尉唐時本小官。詩人爭笑孟酸寒。我來莫道儒官冷。今古酸寒只一般。
隔岸脩筠拂細瀾。風香雨色晝陰寒。遙知新買栖霞地。坡上應添竹數竿。去年新得西湖北
山地。多有竹。
馬蹄赤日走紅塵。汗濕林宗折角巾。輸與夷山班博士。深衣卻脫作閒人。

